

ॐ

আত্ম-দর্শন

—:—

শ্রীমহাতাপচন্দ্র ঘোষ

—:—

মিনার্ভা থিয়েটারে

প্রথম অভিনয়

সন ১৩৩২ সাল ২৩শে শ্রাবণ, শনিবার

মূল্য ১২ টাকা।

প্রকাশক—

শ্রীশিশির কুমার মিত্র, বি, এ,

শিশির পাবলিশিং হাউস,

৫২নং বিডন স্ট্রীট, কলিকাতা।

প্রিন্টার—শ্রীশিশিরকুমার বসু

শিশির প্রেস,

৫২নং বিডন স্ট্রীট, কলিকাতা।

উপহার

আমার পরম পূজনীয় পিতৃদেব
স্বর্গীয়
গোবিন্দচন্দ্র ঘোষ এম, এ, বি, এল,
মহাশয়ের
পবিত্র
স্মৃতি-উদ্দেশে
এই ভক্তির অর্ঘ্য
অঞ্জলি দিলাম

প্রণত সেবক—

শ্রীমহাতাপচন্দ্র ঘোষ (দীন গ্রন্থকার)

ত্রিপুরার ঐতিহাসিক

ভূমিকা ।

প্রায় বার বৎসর পূর্বে যখন আমার মাতাঠাকুরানী ৬কাশীধামে বাস করিতেছিলেন,—আমার সৌভাগ্য বশতঃ কিছুকাল আমি তাঁহার নিকট অবস্থান করিবার পর মাতা ও পুত্রে হরিদ্বারে তীর্থ যাত্রা করি । যাত্রাকালে অযোধ্যা হইয়া লক্ষ্মী ঘাইবার পথে কয়েকটা তীর্থযাত্রী বয়োবৃদ্ধ বাঙ্গালী ভদ্রলোকের সহিত আমার আলাপ হইলে আমার রচিত দুইখানি দেহতত্ত্ব বিষয়ক সঙ্গীত (যাহা আত্ম-দর্শনে বিবেকের প্রথম ও দ্বিতীয় সঙ্গীতরূপে প্রকাশ করা হইয়াছে) তাঁহাদিগকে গাহিয়া শুনাইলে তাঁহারা আমাকে ঐরূপ আর একখানি গান গাহিতে বিশেষরূপে অনুরোধ করেন । তাঁহাদের অনুরোধ উপেক্ষা করিতে না পারিয়া লক্ষ্মী হইতে লাক্ষ্মী জংসন ঘাইবার সময় অযোধ্যা রোহিলগঞ্জ রেলওয়ের মধ্যম শ্রেণীতে বসিয়া, “যদি চাহ সে সুন্দরে কর হৃদয় সুন্দর” গানটা রচনা করিয়া তাহাদের আকুল আকাঙ্ক্ষা মিটাইবার চেষ্টা পাই (ঐ গানটা আত্ম-দর্শনে বিবেকের শেষ গান রূপে ব্যবহার করিয়াছি) । ঐ তিনটা সঙ্গীত এই আত্ম-দর্শনের প্রথম বঁজ বলিলে অত্যাঙ্কি হইবে না । অবশ্য তীর্থস্থানে থাকিবার কালে অনেক সাধু মহাত্মার চরণ পরশে ও তাঁহাদের অমূল্য উপদেশাবলী এবং মহাপুরুষাদিগের জীবনী হইতে সার কথা সংগ্রহ করিয়া এই নাটক সজ্জিত করিয়াছি । পাছে

সাধারণ লোকে বুঝিতে না পারেন সেইজন্য ভাষা প্রাঞ্জল ও অভিনয় কৌশল সরল করিবার জন্য ধ্বংসাত্মক চেষ্টা করিয়াছি। জানি না এই নাটকের মূল উদ্দেশ্য বুঝিতে পারিয়াছি কিনা। তবে নাটক কোরক মাত্র, সু অভিনয়ে তাহা প্রস্ফুটিত হইয়া থাকে। সেইজন্যই অভিনয়ের দিক হইতে বলা যাইতে পারে মিনার্ভা থিয়েটার এই নাটকের জন্য প্রাণপাত পরিশ্রম ও অজস্র অর্থব্যয় করিয়া ইহাকে সাফল্যের পথে লইয়া যাইতে পারিয়াছেন। এইজন্য সেই সম্প্রদায়ের সকলেই আমার নিকট ধন্যবাদের পাত্র। বিশেষতঃ সম্প্রদায়ের অধিকারী শ্রীযুক্ত বাবু উপেন্দ্র কুমার মিত্র বি, এ মহাশয়ের ঋণ আমি কখন পরিশোধ করিতে পারিব না। আমার মত অকিঞ্চিৎকর নাট্যকারের নাটক—তাঁহার নবনির্মিত রঙ্গালয়ের উদ্বোধনে অভিনয় করিয়া আমায় আশাতিরিক্ত সম্মানিত করিয়াছেন। ইহাতে তাঁহার অতিব সংসাহসেরই পরিচয় পাওয়া যায়, কেননা এই “আত্ম-দর্শন” একাধিক থিয়েটারে অভিনয়ার্থ লইয়া যাওয়া হইয়াছিল। তাঁহারা এই বই অভিনয় করিতে সাহসী হন নাই। অজুহত ছিল যে, সাধারণে ইহা বুঝিতে পারিবে না। কিন্তু শ্রীযুক্ত উপেন্দ্রবাবু শিক্ষিত লোক—তিনি ঠিক বুঝিতে পারিয়াছিলেন যে, সাধারণে ইহা পছন্দত করিবেই পরন্তু নাট্য জগতে একটা নূতন আত্মপ্রকাশ কারবে। ইহা হইতে বেশ বুঝিতে পারা যায়, উপেন্দ্র বাবু তাঁহার নব রঙ্গালয়ের দর্শকদিগকে নূতনত্বের পরিবেশন করিয়া তৃপ্ত করিতে বদ্ধ-পরিকর হইয়াছেন। এবং সেইজন্য জলের মত অজস্র অর্থ ব্যয় করিয়া এই নাটককে সাফল্য মণ্ডিত করিয়াছেন।

সুতরাং দর্শক ও নাট্যকার উভয়রূপে আমি তাঁহার নিকট কৃতজ্ঞতা প্রকাশ করিতেছি ।

আর একজন প্রতিভাবান ভদ্রলোকের নিকট আমি বিশেষরূপে কৃতজ্ঞতা পাশে আবদ্ধ হইয়াছি । তাঁহার নাম শ্রীযুক্ত কালীপ্রসাদ ঘোষ বি, এম, সি । ইনি উপেন্দ্র বাবুর ভাগিনেয় । ইঁহার চেষ্টায় ও ষড়্বে এই নাটক সংস্কৃত হইয়া, দর্শকদিগকে আনন্দ দান করিয়াছে । নাটক ও নাটকের পরিকল্পনা আমার হইলেও অভিনয় সাফল্যের গৌরব কালীপ্রসাদ বাবুরই প্রাপ্য । যে স্থানটা কাটিয়া ছাটিয়া ও বর্দ্ধিত কারিয়া দিলে অভিনয়ের উৎকর্ষতা সম্পাদিত হয়, কালী প্রসাদ বাবু তাহা অতি নিপুণ তুলিকা ও সূক্ষ্ম দৃষ্টির সহযোগে সম্পাদিত করিয়াছেন । বিশেষতঃ বৈয়োগ্যের প্রথম সঙ্গীত ব্যতীত আরও তিনখানি সঙ্গীতই তাঁহার নিজের রচিত, যে তিনখানি শুনিয়া দর্শকেরা আশ্চর্য হইয়া উঠেন । সেই সঙ্গে আর ষাটারাই এই বইখানি অভিনয়োপযোগী করিয়া জনসাধারণের নিকট উপস্থিত করিয়াছেন তাঁহাদের নাম প্রকাশ করিবার অনুমতি আমি পাই নাই, তবে সকলেরই নিকট আমি বিশেষ ঋণী এবং আমার গভীর কৃতজ্ঞতা সকলকে জানাইতেছি ।

নাটকগুলিতে সুর সংযোজনা করিয়াছেন প্রসিদ্ধ সঙ্গীতবিদ শ্রীযুক্ত ভূতনাথ দাস । বস্তুতঃ তাহার মধুর সুরের গুণে বইর মাধুর্য্য শতগুণে বৃদ্ধি পাইয়াছে । মিনার্ভার ট্রেজ ম্যানেজার শ্রীযুক্ত পরেশচন্দ্র বসু এই বইর দৃশ্যগুলি প্রস্তুত করিয়াছেন । ষাটারাই আশ্চর্য-দর্শনের অভিনয় দেখিয়াছেন তাহারাই তাহার অদ্ভুত কলানৈপুণ্য দেখিয়াছেন ।

বস্তুতঃ ১৫।২০ দিনের মধ্যে, দিবারাত্র পরিশ্রম করিয়া এত ক্ষিপ্ততার সহিত দৃশ্যগুলি প্রস্তুত হইয়াছিল যে রঙ্গালয়ের সংশ্লিষ্ট ব্যক্তিরাজে বিশ্বয়ে অবাক হইয়া গিয়াছিলেন। ইঁহাদের নিকট আমি আমার আন্তরিক কৃতজ্ঞতা জানাইতেছি।

আর একটি ভদ্রলোকের নাম এই নাটকের ভূমিকায় বিশেষরূপে উল্লেখ যোগ্য। তিনি শ্রীযুক্ত সাতকড়ি গঙ্গোপাধ্যায় (কড়িবাবু)। তাঁহাকে সকলে নৃত্য শিক্ষক বলিয়াই জানেন, আমি কিন্তু দেখিতেছি তিনি আমা অপেক্ষা “ভাব-পাগল”। আজ ছয় বৎসর নাটকখানি অভিনয়ের জন্ত চেষ্টা করিয়া ব্যর্থ মনোরথ হওয়ায় আমি অনেকটা অবসাদগ্রস্ত হইয়া পড়িয়াছিলাম, কিন্তু কড়িবাবু এই নাটকখানি পড়িয়া অবধি, এই দীর্ঘ ছয় বৎসর তাঁহার কল্পনা কার্যে পরিণত করিবার জন্ত চেষ্টার ক্রটি করেন নাই। শ্রীযুক্ত বাবু উপেন্দ্র কুমার মিত্র মহাশয়ের নিকট আনিয়া তাঁহার সে আশা পূর্ণ হইয়াছে। ছোট ছোট বালিকাগুলির অস্তরের ভিতর অভিনয়ের ভাব প্রবেশ করান, বড় সহজ কাজ নয়, সে বিষয়েও কড়িবাবু সিদ্ধহস্ত। আর তাঁহার নৃত্যের প্রশংসার কথা আমার না বলাই ভাল, সাধারণে সকলেই জানেন তিনিই এখন বাঙ্গালা-রঙ্গালয়ে নৃত্যের রাজা।

উপসংহারে শ্রীযুক্ত বাবু মন্থন নাথ পাল (হাঁড়ু বাবু) কথা না বলিলে ভূমিকা অসম্পূর্ণ রহিয়া যায়। হাঁড়ুবাবু মিনার্ভার সর্কস্ব, তাঁহারই অক্লান্ত পরিশ্রমে মাত্র দুই সপ্তাহে এত বড় নাটকখানি সম্পূর্ণ হইয়াছে, আমার বোধ হয়, সকলের অভিনয় অংশ ভাল করিয়া প্রস্তুত করিবার জন্ত তাঁহার নিজের অংশ “মনরাজা”কে গঠিত

করিতে তিনি অল্প সময়ই প্রাপ্ত হইয়াছেন, তথাপি তিনি যেরূপ সুন্দর অভিনয় করিয়াছেন তাহা আমার বড়ই ভাল লাগিয়াছে ; ভগবানের শ্রীচরণে প্রার্থনা করি তিনি দিন দিন দর্শকগণকে “আত্ম-দর্শনের” প্রধান ভূমিকা মন রাজার অংশের চরমোৎকর্ষ দেখাইয়া লোক শিক্ষা দিন ।

আত্ম-দর্শন কেন লিখিলাম ? একদিন ৩কাশীধামে স্বর্গীয় মহাকবি ও নাট্যসম্রাট গিরিশ চন্দ্র ঘোষ মহাশয়ের প্রণাত শঙ্করাচার্য্য মহা নাটকখানি আমার ৩মাতা ঠাকুরাণীকে পাড়িয়া শুনাইলে, তিনি উক্ত নাটকখানির অভিনয় দেখিতে ইচ্ছা প্রকাশ করেন, আমি তখন তাহাকে কলিকাতায় লইয়া আসি । কিন্তু শত চেষ্টা করিয়াও উক্ত নাটকের অভিনয় তাঁহাকে দেখাইতে পারি নাই । কারণ, কলিকাতায় আসিয়া দেখিলাম উক্ত নাটক এখন আর বেশী অভিনয় হয় না. — কেবলমাত্র ভূতপূর্ব মনমোহন থিয়েটারে শিবরাত্রির রাত্রে অনেকগুলি নাটকের সহিত শঙ্করাচার্য্য অভিনয় হইয়া থাকে, তাহাতেও আবার নটচূড়ামণি সুরেন্দ্রনাথ ঘোষ (দানী বাবু) শঙ্করাচার্য্যের অংশ অভিনয় করেন না । সাধারণ অভিনেতারী নাটকের অনেকাংশ বাদ দিয়া কোনরূপে কাজ চালাইয়া থাকেন । শিবরাত্রিতে থিয়েটারে মহিলার আসনে অসম্ভব ভিড়ও হইয়া থাকে । এই সকল কারণে আমার ৩মাতাঠাকুরাণীর শঙ্করাচার্য্য অভিনয় দেখা হয় নাই । তাঁহার সেই ক্ষোভ মিটাইতে আমি আত্ম-দর্শন নাটক লিখিতে আরম্ভ করি ; প্রত্যহ এক এক দৃশ্য লিখিয়া ৩মাতাঠাকুরাণীকে শুনাইয়া

যাই এবং তাহারই উৎসাহ ও উপদেশে নাটকখানির সম্পূর্ণ করিতে সমর্থ হইয়াছি।

একদিন দেখিলাম আমার সুপ্ত বাসনা যুক্তি পারগ্রহ করিয়া নাটকরূপে পরিণত হইয়াছে। ভাবের আবেগে ত্রিশখানি সঙ্গীত নাটকে সংযোজিত করিয়া ফেলিয়াছি। আত্মীয়, স্বজন, বন্ধু বান্ধব সকলকে পড়িয়া শুনাইতে আমার কতই বা উৎসাহ! সেই সময় আমার স্বগীয় স্নেহময়ী জননী আমায় বলিলেন যে তাহার শঙ্করাচার্য অভিনয় দেখা হয় নাই বলিয়া যে ক্ষোভ ছিল, তাহা আর নাই। তৎবিনিময়ে এই আত্ম-দর্শন অভিনয় দেখিবার সাধ হইতেছে। আমি সেই দিনই বন্ধুবর ব্যবসায়ী ও জমিদার শ্রীযুক্ত বাবু মনোমোহন পাণ্ডে মহাশয়কে এই নাটক অভিনয় করিবার জন্য অনুরোধ করিলে তিনি আমাকে তাহার অংশিদার প্রসিদ্ধ নটচূড়ামণি সুরেন্দ্র নাথের (দানী বাবুর) নিকট পাঠাইয়া দেন। সুরেন্দ্র নাথ (দানী বাবুও) নাটকখানি আগাগোড়া শুনিয়া অভিনয়ের জন্য মত প্রকাশ করিয়াছিলেন। কিন্তু আমার দুর্ভাগ্য বশতঃ মনোমোহন থিয়েটারের সুপ্রসিদ্ধ বিজনেস ম্যানেজার চারুচন্দ্র বসু মহাশয়ের মত না হওয়ায় এই নাটক অভিনীত হয় নাই, কেননা উক্ত চারুবাবুই ঐ রঙ্গালয়ের সর্বেসর্ব্বা ছিলেন। অবশ্য সে জন্য আমি তাহাকে দোষ দিতেছি না—তিনি আমার লিখিত নাটকখানির সূখ্যাতিই করিয়াছিলেন। এমন কি আমি নাটকখানি ছাপাইলে তিনি হাজার খণ্ড পুস্তক বিক্রয় করাইয়া দিবেনও বলিয়াছিলেন। তবে তিনি বলিয়াছিলেন যে, এই নাটক সাধারণে বুঝিতে পারিবে না। আমি তাহাকে অনেক

বুঝাইয়া ছিলাম যে, সাধারণে যাহাতে বুঝিতে পারে আমি তাহার
 অন্ত বিশেষ চেষ্টা করিয়াছি। তথাপি সে কথা তিনি শুনে নাই।
 যাহা হউক আমার অনেক দিনের আকাঙ্ক্ষা মঙ্গলময়ের কৃপায়
 দর্শকদিগের সন্মুখে প্রদর্শন করিতে পারিয়া আমি ধন্য হইয়াছি।
 কিন্তু আমার স্নেহময়ী পরম আরাধ্যা জ্ঞানময়ী জননী আর ইহধামে
 নাই। তাহাকে এই নাটকের অভিনয় দেখাইতে পারিলাম না এই
 দুঃখ আমার রহিয়া গেল। কিন্তু তিনি যেখানেই থাকুন, তাহার
 আশীর্বাদ নিশ্চয়ই আমাকে অদ্বয়কৃত করিবে—এ নিশ্বাস আমার
 হৃদয়ে বদ্ধমূল আছে।

সাধারণের নিকট আমার সকাংতরে প্রার্থনা তাহারা যেন আমার
 ভুল বুঝিয়া না বসেন। আমি সাধু মহাত্মা বা দার্শনিক কিছুই নই।
 আমি সাধারণ লোক মাত্র—তবে সংসারে আসিয়া জীব আত্মোন্নতির
 চেষ্টা না করিলে শেষে তাহার মহা ক্ষোভ উপস্থিত হইয়া থাকে।
 সেইটী দেখাইবার প্রয়াস পাইয়াছি। সুখ দুঃখে ভ্রমণ না করিয়া
 সত্যপথ অবলম্বন পূর্বক—জ্ঞান লাভ করিয়া প্রকৃত আনন্দের সন্ধান
 করা প্রত্যেকেরই উচিত, ইহা সকল মহাজনই ব্যক্ত করিয়াছেন,
 আমি তাহা সরলভাবে দেখাইতে চেষ্টা করিয়াছি মাত্র। সাধারণে
 ইহা বুঝিতে পারিলে শ্রম সার্থক জ্ঞান করিব। ইতি তারিখ।

৪নং রাসিক ঘোষ লেন, হাটখোলা,
 কলিকাতা।

দীন নাট্যকার
 শ্রীমহাতাপচন্দ্র ঘোষ

শ্রীগৌর হরি বসাক

মিনার্ভা থিয়েটার ।

- স্বত্বাধিকারী—শ্রীযুক্ত উপেন্দ্র কুমার মিত্র, বি-এ ।
রিহার্স্যাল মাস্টার—শ্রীমন্নথনাথ পাল (হাঁড়বাবু) ।
অপেরা মাস্টার—শ্রীভূতনাথ দাস ।
নৃত্য শিক্ষক—শ্রীসাতকড়ি গঙ্গোপাধ্যায় (কড়িবাবু) ।
বংশীবাদক—শ্রীলালবিহারী ঘোষ ।
হারমোনিয়াম বাদক—এ, সি, পাল (বিদ্যাভূষণ) ।
ট্রেন্ড ম্যানেজার—শ্রীপরেশচন্দ্র বসু ।
সঙ্গতকার—শ্রীমুটবিহারী মিত্র ।
স্মারক—শ্রীজ্ঞানরঞ্জন বসু ।

শ্রীগৌর হরি—

প্রথম অভিনয় রজনীর পাত্র-পাত্রীগণ ।

- মন—শ্রীযুক্ত মন্নথনাথ পাল (হাঁড়বাবু) ।
বুদ্ধি—শ্রীযুক্ত কুঞ্জলাল চক্রবর্তী ।
অহঙ্কার—শ্রীঅমূল্যচন্দ্র দত্ত ।

৫ম রাত্রি হইতে শ্রীমৃত্যঞ্জয় পাল ।

- মদন ও কাম—শ্রীতুলসীচরণ বন্দ্যোপাধ্যায় ।
ক্রোধ—শ্রীসত্যেন্দ্রনাথ দে ।
মোভ—শ্রীসন্তোষকুমার দাস (ভুলো) ।

মোহ—শ্রীমতী অমিয়বালা

মদ—শ্রীমতী উষারানী

মাৎস্য—

বিবেক - শ্রীমতী আঙ্গুরবালা

বৈরাগ্য—শ্রীমতী রেণুবালা (২)

জ্ঞান—শ্রীকার্তিকচন্দ্র দে ।

সুখ—শ্রীমতী রেণুবালা (১)

দুঃখ—শ্রীমতী ভবাণীবালা

প্রবৃত্তি—শ্রীমতী মনোরমা

নিবৃত্তি—শ্রীমতী নগেন্দ্রবালা

রতি—শ্রীমতী সুবাসিনী

হিংসা—শ্রীমতী শরৎসুন্দরী

লালসা—শ্রীমতী প্রকাশমণি

কুমতি—শ্রীমতী শশীমুখী

সুমতি—শ্রীমতী আশমানতারা

নিষ্ঠা—শ্রীমতী কুমুদিনী

ভক্তি—শ্রীমতী নবতারা

কুমতি ও সুমতি সন্ধিনীগণ—শ্রীমতী মতিবালা, শ্রীমতী

ননীবালা (২) শ্রীমতী আঙ্গুরবালা শ্রীমতী সত্যবালা, শ্রীমতী মনোরমা

(৩) শ্রীমতী রেণুবালা (১) শ্রীমতী পটলসুন্দরী শ্রীমতী মহামায়া

শ্রীমতী পার্শ্বারানী (১) শ্রীমতী পার্শ্বারানী (২) শ্রীমতী বিণাপাণী,

শ্রীমতী তারকদাসী শ্রীমতী গৌরী ।

শ্রীমদেবংগলীয়া

ও

আত্ম-দর্শন

পুরুষ চরিত্র

মদন ।

মন	হৃদয়পুর রাজ্যের রাজা ।
বুদ্ধি	ঐ মন্ত্রী ।
অহঙ্কার	ঐ সেনাপতি ।
ধর্ম	ঐ পুরোহিত ।
কাম	}	...	প্রবৃত্তির গর্ভজাত
ক্রোধ		...	মনের পুত্রজয় ।
লোভ		...	কামের পুত্র ।
মোহ	ক্রোধের পুত্র ।
মদ	লোভের পুত্র ।
মাৎস্য	
বিবেক	}	...	নিবৃত্তির গর্ভজাত মনের পুত্রজয় ।
বৈরাগ্য		...	
জ্ঞান	মনের কুলগুরু ।
সুখ ও দুঃখ	মনের পরিচারকজয় ।

—

স্ত্রী চরিত্র ।

রতি ।

প্রবৃত্তি	মনের পাটরাণী ।
নিবৃত্তি	মনের পরিত্যক্তা প্রথমা মহিষী ।
রতি	কামের পত্নী ।
হিংসা	ক্রোধের পত্নী ।
লালসা	লোভের পত্নী ।
কুমতি	প্রবৃত্তির সহচরী ।
সুমতি	নিবৃত্তির সহচরী ।
নিষ্ঠা	পুরোহিত ধর্মের স্ত্রী ।
ভক্তি	নিবৃত্তির প্রতিবেশিনী ।
শ্রীতি	}	...	ভক্তির ভগিনীদ্বয় ।
শাস্তি			

কুমতি সন্ধিনীগণ ও সুমতি সন্ধিনীগণ, ইত্যাদি

ত্রিপুরার ইতিহাস

অবতারণা ।

এই জীবনটাই অভিনয়
কেউ সেজে রাজা শাসায় প্রজা
কেউ প্রজা সেজে দণ্ড সয় ॥
কে কার পুত্র কে কার নারী
সেজেছি রকমারি,
(এই) দেহ মাত্র পোষাক তারি—দিছি যার পরিচয়
যিনি শুদ্ধ বুদ্ধ মুক্ত স্বাধীন
তিনি করী যেমন মাহুত অধীন
তাঁর ক্ষুদ্র চোখেতে পায়না দেখিতে নিজের দেহ সমুদয়

প্রস্তাবনা ।

মহাশক্তির গীত ।

যদি দেখিতে চাও আপনারে ।

আসে পাশে মিছে দেখে কতু সে থাকে না দূরে ॥
মনরাজা তার দুটি রাণী, নিত্য করে কান ভাঙ্গানী
কেউ সুপথে কেউ কুপথে চায় নে যেতে আপন জোরে,
বিবেক যদি বোঝায় এসে, বৈরাগ্যে নিয়ে পাশে,
জ্ঞান গুরুর উপদেশে আপনারে চিন্তে পারে ॥

শ্রীমতী হরি বসাক

শ্রীগৌর হরি বসাক

ওঁ

আত্ম-দর্শন

—:~:—

প্রথম অঙ্ক ।

—:~:—

প্রথম দৃশ্য ।

হৃদয়পুর রাজার বিলাস ভবন ।

মন, অহঙ্কার ও বুদ্ধি ।

মন । আরে, এস, এস মন্ত্রী, এস সেনাপতি ; বোস ।

(বুদ্ধি ও অহঙ্কারের অভিবাদন করিয়া আসন গ্রহণ)

মন । কি বল মন্ত্রী, আমার মত রাজ্য, আমার মত ঐশ্বর্য
আর কার আছে ? আমি মনে করলে কি না করতে পারি ?
আমি কি গর্ভ করে বলতে পারি না, যে আমা অপেক্ষা বলবান্
বুদ্ধিমান্ ও ঐশ্বর্যবান্ জগতে আর কেউ নেই ?

অহঙ্কার । নিশ্চয়ই মহারাজ, আপনি সে গর্ভ করতে পারেন না

ত পারে কে । এই হৃদয়পুর রাজ্যের আপনি একচ্ছত্র অধিপতি । আমি অহঙ্কার আপনার প্রধান সেনাপতি, মহা কৌশলী বুদ্ধি আপনার মন্ত্রী ; রত্নগর্তা মহারানী প্রবৃত্তি আপনার মহিষী, আপনার অপেক্ষা এই রাজ্যে আর কে শ্রেষ্ঠ হ'তে পারে ?

বুদ্ধি । মহারাজ যা বলেছেন তা সত্য, কিন্তু এ হৃদয়পুর রাজ্য কি এমনভাবে চিরকাল অক্ষুণ্ণ থাকবে ?

মন । সে চিন্তায় আমার প্রয়োজন কি ? কি থাকবে, কি না থাকবে, সে ভাবনা কল' ভোগ করা চলে না, মন্ত্রী ! তোমাদের মহারানী প্রবৃত্তি দেবীর মহিষী হয়ে প্রাসাদে প্রবেশ করা অবাধ আমি মহানন্দে আছি । কুমতি বলে তাঁর এক সঙ্গিনী সঙ্গিনী আছে, সে আমায় নানাদিকে ঘুরিয়ে নিয়ে বেড়ায় ও অনেক রকমে আমোদ প্রদান করে ।

বুদ্ধি । মহারাজ ! ঐ সঙ্গিনীটি কি মহারানীর পিত্রালয় থেকে এসেছেন ?

মন । তুমি ষথার্থই অনুমান করেছ । রাণী বলেন, "মহারাজ, কুমতি বলে আমার একটি বাল্য সঙ্গিনী আছে ; তাকে ছেড়ে আমি একদণ্ডও থাকতে পারি না, মহারাজের অনুমতি হ'লে সে আমার সঙ্গে রাজবাড়ী যেতে পারে ।" সেই অবধি সে এই রাজপুরীতে অবস্থান কচ্ছে । তাঁর এইসব সঙ্গিনীরা আমার সঙ্গে সঙ্গাই থাকে । এদের হাবভাব ও নৃত্যগীতে মোহিত হ'তেই হবে ।

অহঙ্কার । তাহঁত বল্লুম মহারাজ, আপনার অপেক্ষা সৌভাগ্য আর কার আছে ?

মন । ভোগ, ভোগ, ভোগ—ভোগ ভিন্ন এ জগতে আর কিছুতেই লোকে সুখী হ'তে পারে না । সেই ভোগ আমি ক্রমাগত উপভোগ করি, এব বিরাম নেই, এ তৃষ্ণা যেটে না । তবে বল দেখি আমি সুখী না দুঃখী ?

(নেপথ্যে) বিবেক । মহারাজ, আপনি মহাদুঃখী ।

মন । (সোৎসুকে) কে ? কে ? কে বলে আমি মহাদুঃখী ?
বুদ্ধ । একথা কে বলে মহারাজ ?

অহঙ্কার । তাইত, কে বলে ? প্রহরি, প্রহরি ?

মন । সেনাপতি, তুমি এখানে দেখত, কার এতদূর স্পর্ধা ?
দগ্ধ পেনে তাকে বন্ধন করে আমার নিকট নিয়ে এস ।

(বিবেকের প্রবেশ ।)

বিবেক । বন্ধন কণ্ডে হবে না মহারাজ, আমি আপনহ
সোছি ।

মন । কে তুমি যুবক ? তোমার সাহস দেখে আমি বিস্মিত
হয়েছি ।

অহঙ্কার । তুমি কার অহুমতিতে এ পুরীর ভেতরে প্রবেশ
কবেছ ?

বিবেক । আমি মহারাজের সহিত সাক্ষাৎ কর্তে এসেছি ।

মন । আমিই মহারাজ,—এই হৃদয়পুরের অধিপতি । যুবক,
তোমার বক্তব্য শীঘ্র প্রকাশ কর ।

বিবেক । মহারাজ, আপনি বলছিলেন, আপনার চেয়ে সুখী

আর কে আছে ? আমি দেখছি আপনার চেয়ে দুঃখী আর কেউ নেই।

বুদ্ধি। তুমি কি জন্ম এ কথা বললে ?

বিবেক। আমার মহারাজ যা প্রশ্ন করবেন, আমি তার উত্তর প্রদান করব, অন্তথা নয়।

মন। তুমি অগ্রে পরিচয় দাও কে তুমি ?

বিবেক। আমি আপনার পুত্র।

মন। আমার পুত্র।

বিবেক। আজ্ঞে হাঁ মহারাজ আপনারই পুত্র।

মন। মর্জি, এ বলে কি ? আমার পুত্র।

বুদ্ধি। অসম্ভব, অসম্ভব।

মন। সত্য বল, নতুবা ভীষণ দণ্ড পাবে।

বিবেক। মিথ্যা জানি না মহারাজ, আপনার প্রথমা মহিষী নিবৃতি দেবীর গর্ভে আমার জন্ম। আমার নাম বিবেক।

মন। তুমি কি বলছ ? আমি তাকে বহুকাল বনবাসে দিয়ে এসেছি—সে পুত্রহীনা।

বিবেক। সত্য মহারাজ, আমার পরমারাধা জননীকে ও আপনার গুণবতী সহধর্মণীকে আপনি বনবাস দিয়েছিলেন বটে, কিন্তু তিনি পুত্রহীনা ন'ন, তাঁর গর্ভে আমি জন্মগ্রহণ করেছি। আমার নাম বিবেক। মহারাজ, আপনার পূর্ব পরিণীতা আমার জননীও আমার সঙ্গে মহারাজের সাক্ষাৎ প্রার্থিনী হ'য়ে এসেছেন,—
ারে অবস্থান করছেন।

বুদ্ধি । মহারাজ নূতন বিবাহ করেছেন—

বিবেক । সে মিথ্যা বিবাহ, অবিদ্যার মায়া মাত্র ।

অহঙ্কার । স্পর্ধা দেখ ।

বিবেক । পিতা, আমার প্রার্থনা শুনুন । আপনি মিথ্যা মায়ায় প্রতারিত হবেন না, অবিদ্যার প্রভাবে আপনি আপনাকে চিন্তে পাচ্ছেন না । পিতা এ সকলই মায়া, আপনি সবে এটি মিথ্যার সংসারে প্রবেশ কচ্ছেন, এখনও সাবধান হোন । এরা আপনাকে মোহিত করে, স্বকার্য উদ্ধার করে লোষ্ট্রবৎ পরিত্যাগ করবে । এরা কেউ আপনার বন্ধু নয়—পরম শত্রু । এখনও সাবধান হোন, বৃথা হাহাকারের সৃজন করবেন না !

মন । তুমি যদি আমার পুত্র হ'তে, তা হ'লে কখনই আমার এরূপ গুরু মত উপদেশ দিতে সাহস কর্তে না ।

বিবেক । সত্যই পিতা, আপনা হ'তেই আমার জন্ম ।

মন । তুমি নিশ্চয়ই পাগল ; দেখছি এখানে প্রলাপ বকতে এসেছ । আমি বৃথা সময় নষ্ট কর্তে পারব না । এখন তুমি আমাদের বন্দী হ'লে । পরে অবসর মত তোমার কথা শুনে তোমার বিচার করব । সেনাপতি, তুমি একে আমার পরিত্যক্ত দুঃখ সাগর তীরে নির্জন কুটীরে বন্দী করে রাখ । পরে আমি বিচার করে দণ্ড প্রদান করব । আমি এখন রাণী প্রবৃত্তিকে নিয়ে সুখ সরোবরে ঘাব ।

বিবেক । দণ্ড দিন তাতে কোন দুঃখ নাই, পিতা, আমরা সুখ দুঃখের অতীত, আমরা ত আপনার মত পিপাসায় কাতর হই না ।

আপনি এখনও স্থিরচিত্তে বিবেচনা করুন, আপনার শত্রুতা করে আমার লাভ কি পিতা? পিতা, আপনি মোহাচ্ছন্ন, বৃথা মায়ায় অভিভূত, আপনাকে রক্ষা করাই আমার ধর্ম। দেখুন এই অহঙ্কার আপনাকে গর্বিত কচ্ছে, বুদ্ধি মস্তগাছলে শুধু আপনার তোষামোদ করে। আপনার রাণী প্রবৃত্তি আপনাকে বৃথা ভোগ সুখে প্রলোভিত করে;—আর তার সঙ্গিনী কুমতি আপনাকে তাড়িত ক'রে নিয়ে বেড়ায়। পিতা, আকাশের মত আপনি নির্মল, সেই আকাশে বিষবাষ্প প্রবাহিত হচ্ছে, বিষাক্ত বায়ুস্পর্শেই আপনার এই পিপাসা, এ পিপাসা কখনও মেটে না, এর পরিণাম বড়ই বিষম। পিতা, এখনও সাবধান হোন, এই দারুণ সর্বনাশী কুহকীদের হস্ত হ'তে আপনাকে উদ্ধার করুন।

(প্রবৃত্তির প্রবেশ।)

প্রবৃত্তি। কে কাকে উদ্ধার করবে মহারাজ?

মন। রাণি, ও একটা পাগল। ও বলে আমি মহা দুঃখী, আমি তোমাদের এনে কেবল আপনার ভাবী দুঃখের সৃজন করছি।

প্রবৃত্তি। সত্য নাকি?

মন। যাও সেনাপতি, আমার আজ্ঞা পালন কর।

(অহঙ্কার ও বিবেকের প্রস্থান।)

প্রবৃত্তি। মহারাজ, শুনলুম এটি আমার সপত্নী পুত্র, এর মানে কি মহারাজ?

মন । পাগল ! বলে, ওর যা আমার স্ত্রী ছিল, তার প্রমাণ কি ? চল প্রিয়ে বৃথা সময় নষ্ট হয়ে গেল, আর নয়, সুখ সরোবরের তীরে কুমতি সঙ্গিনীদের নৃত্যগীত শুন্তে হবে। দেখ মন্ত্রি, সব বৃথা – কেবল আমোদ, কেবল ভোগ।

বুদ্ধি । যা বলেছেন মহারাজ, কেবল আমোদ, কেবল ভোগ।

(সকলের প্রশ্নান।)

দ্বিতীয় দৃশ্য ।

সুখ সরোবরের তীরস্থ উদ্যান।

বসন্ত সহচরগণের নৃত্য

যদন ও রতি।

গীত।

যদন-রতি।

আমরা দুজনেই সমান।

করি কেবল শীকারের সন্ধান।

যদন।

আমার ফুলধনু, তাতে জুড়ি ফুলবান,

রতি।

আমি দেখি বেয়ে চেয়ে, আছে কিনা আছে প্রাণ।

মদন । দেখি যদি সহিতে পারে
 বুঝে তারে,
 বেছে বেছে হানি বাণ ।
 রতি । মনের মতন হ'লে নারী
 তার তরে নাগর ধরি ;
 মদন । আমি শুধু বাণটি ছাড়ি
 যেথায় থাক নাই পরিভ্রাণ ।

রতি । আজ এ আবার কি খেলা ?
 মদন । বাণ বিধেছে ।
 রতি । কোথায় ?
 মদন । মানুষের হৃদয়ে ।
 রতি । তাতে কি ?
 মদন । হৃদয় তোলপাড় ।
 রতি । আমার ভয় হয় ।
 মদন । কেন ?
 রতি । আবার পাছে ভয় হও ।
 মদন । (হাস্তকরণ)
 রতি । ইসলে যে ?
 মদন । সে যে কৈলাস !

রতি । এ কোন্‌ নয় ? এতেও যোগমগ্ন মহাদেব ।

মদন । ভয় নেই, এ তাঁর প্রতিনিধি মাত্র ।

রতি । তবে কি মানবহৃদয়ে তুমি জন্মাবে ইচ্ছা করেছ ?

মদন । ঠিক ধরেছ ।

রতি । আমার উপায় ?

মদন । ভয় নেই, এতে তুমি আমার সঙ্গিনী থাকবে ।

রতি । দেখো, যেন কেঁদে কেঁদে না বেড়াই ।

মদন । বল্লুম ত ভয় নেই, ঐ আস্‌ছে, তুমি এগিয়ে যাও !

রতি । আমি ?

মদন । হাঁ, তুমি, আমি বাণ মেরোঁছ তাতে সে অস্থির । বাণ
মালের্তে কারুর নিস্তার নাই, আমারও নয় ।

রতি । কেন ?

মদন । সেখায় আমায় জন্মাতে হবে ।

রতি । তবেইত গোল ।

মদন । না গোল কিছুই নেই । রাণী প্রবৃত্তি তোমায় পূজা
করবে, কুগতিতে তুমি আত্মগোপন কর । রাজা মন মুগ্ধ, তোমার
ক্রীড়ায় আরও মুগ্ধ হবে । পরে আমি জন্মাব, আর আর অনেকে
জন্মাবে,—ভারি মজাই হবে ।

রতি ! এখন কি কর্তে হবে তাই বল ।

মদন । ওদের নিয়ে তোমার ক্রীড়ায় রত কর, তা'হলেই আমরা
জন্মাব, পরে তোমার সঙ্গে আবার দেখা হবে ।

রতি । আদ্যার বলছি, আমায় যেন কাঁদিও না দেখ ।

(রত্নির গীত)

নিমেষে হারাই ।

বুঝেছি পেয়েছি জ্বালা সদাই ভাবনা তাই ।

আগে কি জেনেছিলে,

অরসিক অনল ভালে,

মজাতে গাঁজলে তুমি, অনাথিনী তুমি আমি

শূন্যধরা—পাগল পারা

আমাতে আর আমি নাই ॥

—————

মদন । না, বল্লুম ত ভয় নেই । এতে তোমায় আমায় ছাড়া-
ছাড়ি হবে না ।

রত্নি ! তা হলেই বাঁচি ।

মদন । তুমি ঘাও—কুমতিতে প্রথমে আত্মগোপন করে রাণীকে
আশ্রয় কর ।

(উভয়ের উভয় দিক দিয়া প্রশ্নান)

—————

তৃতীয় দৃশ্য ।

সুখ সরোবর তীর ।

মন ও প্রবৃত্তির প্রবেশ ।

মন । দেখ রাণি, কি মনোরম এই সুখ সরোবর । এখানে তোমার সখী কুমতি সুন্দরী আমায় নিত্য নূতন আমোদ দান করে, রাণী, আজ তোমার সেই অপূর্ব সুন্দরীটিকে দেখতে পাচ্ছি না কেন ? কুমতি ছাড়া ত তুমি একদণ্ডও থাকতে পার না ।

প্রবৃত্তি । আজও নেই মহারাজ, ঐ দেখুন ফুল পরে; ফুলের মালা গলায় দিয়ে, ফুল হাতে করে কুমতি আস্চে ।

(কুমতির প্রবেশ ।)

গীত ।

আমি যোগাই নূতন ফুলের মধু ।

ষেথায় থাক, সেথায় পাবে, মনে রাখলে আমার শুধু ॥

মনে প্রাণে যে ভজে আমায়, মনের সুখে থাকে সে ধরায় ;

নানা ফুলের মধু সে খায়, হো'কনা কেন কুল বধু ॥

পড়লে আমার প্রণয় জ্বলে, ভয় থাকে না কোন কালে ;

মনের মতন মনে মিলে আনন্দ পায় শুধু শুধু ॥



প্রবৃতি । একি সখি, আজ যে বেজায় বাহার দিয়েছ দেখছি, এত ফুল আজ কোথায় পেলে ?

মন । তাই ত, সখি, আজ যে ফুলরাণী সেজেছ দেখছি ।

কুমতি । আজ্ঞে হাঁ মহারাজ, আজ সুখসরোবরে স্নান করে উঠেই দেখি, আমার গায় ফুলের গন্ধে, গলায় ফুলের মালা, মাথায় ফুলের মুকুট, ফুলের অলঙ্কারে ঠিক যেন মদনের রতি সেজেছি । তাতেও তৃপ্তি নেই, আবার আপনাদের জগ্ন এই অপূর্ব কুমুমটি চয়ন কর্তে গিয়েছিলুম ! এই নিন মহারাজ, এর গন্ধে মোহিত হ'বেন ।

(পুষ্প প্রদান ।)

সখি, এস আজ তোমাদের দুজনকে ফুল দিয়ে আমরা পূজা করবো ।

প্রবৃতি । তাইত, আজ যে দেখছি তোমার ভারি ভক্তি, ভিতরে কিছু আছে নাকি ?

কুমতি । ভেতর বার আজ সমান । আসুন মহারাজ এই পুষ্পবাটীকায় উপবেশন করুন ; আজ মদনের পূজা হবে, আজ স্বয়ং মদন পূজা গ্রহণ করবেন ।

মন । কোথায় তোমার মদন ?

কুমতি । বদনখানি দেখুন না মহারাজ ? আপনিই আমাদের মদন, আর রাণী প্রবৃতি আমাদের রতি । ঐ দেখুন চতুর্দিক আমোদিত, কোকিল ডেকে উঠল, অলি গুন গুন করছে,

ওলো তোরা আয়লো আয়, মদন এসেছে, মদন এসেছে, মদন এসেছে ।

(চতুর্দিকে ফুল ফুটিয়া উঠিল, ভ্রমর উড়িল, পাখীরা ডাকিতে লাগিল ।)

(কুমতি সঙ্গিনীগণের গান করিতে করিতে প্রবেশ ।)

গীত !

ফুর্ ফুর্ ফুর্ ফুর্ বইছে হাওয়া সামনে থাকা দায়
কে কার সহি, গায়ে পড়ে যাই, আয়লো সরে আয় ॥
ঝির্ ঝির্ ঝির্ ঝির্ মলয় বাতাস বইছে ধীরে ধীরে ।
শির্ শির্ শির্ শির্ শিউরে উঠি প্রাণ কেমন করে ;
চল্ চল্ চল্ চলে চল্ সহি কাজ কি আর হেথায়,
কোথায় বঁধু শুধু শুধু এমন মধুরাতি বয়ে যায় ॥

মন । তাইতো, তাইতো, বড় নেশা, বড় পিপাসা, সবই যেন হাঁসছে, সবই যেন ডাকছে । কাকে ছাড়ি কাকে ধরি ? সবাই পরী সবাই পরী ।

প্রবৃতি । মহারাজ কি পাগল হ'লেন ?

কুমতি । না সখি—এ মদনের বাণ ।

মন । না না তোমরা জান না, অন্ধ অলি যেমন ফুলের গন্ধে

উল্লসিত হয়, আমি ঠিক তাই হয়েছে, আমি যেন হারিয়ে গেছি,
সবাই ফুল, সবাই ফুল, একা আমি ভ্রমর, আমি ভ্রমর। গাও গাও
আবার গাও, বড় পিপাসা।

কুমতি। স্থলপদের মধুপান করুন, তৃষ্ণা নিবারণ হবে।

(মধু দান)।

মন। (পান করিয়া) না, এ তৃষ্ণা যায় না, কেবলই বাড়ে,
তোমরা গাও। রাণী, কাছে এস। আজ তুমি বড় সুন্দর সেজেছো।
কে তোমায় সাজিয়েছে রাণী? বাঃ বাঃ মরি মরি! তোমার
সঙ্গিনীরাও ঠিক তোমার মত সেজেছে। আমি আমোদ করি,
শুধু আমোদ, শুধু আমোদ; কাছে এস, কাছে এস, আমায় পাগল
কোরো না?

প্রবাস্তি। এই যে মহারাজ, আমি কাছেই আছি।

মন। আমায় ধরে বসো। সখি তোমরা গাও।

কুমতি। তাই বোস্ না বাপু। ওলো তোরা গা।

(কুমতির সঙ্গিনীগণের গীত।)

কোথা আর যাবে বঁধু রাখব হৃদয়-মাঝারে।

দেখবো এবার কি করে আর ছেড়ে যাবে আমারে ॥

চ'খে চ'খে মুখে মুখে,

বুকে বুকে, মন স্থখে ;

বাহু পাশে প্রেম ফাঁসে বঁধব নাগর তোমারে ॥

গেঁথে মালা গলে দিব বঁধু,
 প্রেম খেলা আজ খেলবো শুধু ;
 অধরে অধরে পিব প্রেম মধু, পালাবে বঁধু কি করে ॥

চতুর্থ দৃশ্য ।

বনপথ ।

সুখ ও দুঃখ ।

- সুখ । একি দুঃখ তুমি এখানে ?
 দুঃখ । আরে একি সুখ, তুমি এখানে ?
 সুখ । আমি ভাই এক যায়গায় চিরদিন থাকি না ।
 দুঃখ । সেই সময় আমি থাকি যখন তুমি থাক না ।
 সুখ । ওঃ তাই বুঝি দেখা সাক্ষাৎ নেই ?
 দুঃখ । কখন আর হবে ভাই ?
 সুখ । এখন তুমি থাক কোথায় ?
 দুঃখ । তুমিও যেথায় ।
 সুখ । মানুষের মনে ?
 দুঃখ । বল্লুম তো তুমিও যেখানে ।
 সুখ । এক জন্মে ? না— জন্মান্তর ধরে ।

দুঃখ । যে যেমন কর্ম করে । পূর্বজন্মে ছিল রাজা এ জন্মে
ভিখারী, আমি তাকে গিয়েই ধার ।

সুখ । মধ্যে মধ্যে আমিও উঁকি মারি ।

দুঃখ । সত্যি নাকি ?

সুখ । নয়তো কি ।

দুঃখ । যেথায় সুখের গন্ধ পাই, ফাঁক পেনে, আমিও সেথায়
যাই ।

সুখ । তবে তু তুমি আমার ভাই ?

দুঃখ । আমিও বলি তাই ।

সুখ । আমি মায়া দেবীর মায়া ।

দুঃখ । আমি শাস্তি দেবীর ছায়া ।

সুখ । আমাদের দুজনকেই যে ছাড়িয়ে যাবে, সেই শাস্তি
পাবে ।

দুঃখ । তা হলেতো তার মায়া কেটে যাবে, মহামায়ার কোলে
গিয়ে উঠবে ।

(উভয়ের গীত !)

সু ও দুঃ । আমরা সুখ দুঃখ দুটা ভাই !

চলি দুজনে, আগে পিছনে যেথায় সময় সেথায় যাই !

সুখ । লোকে জন্ম জন্ম খোঁজে মোকে,

দুঃখ । আসতে হয় তাই আমাকে,

দুঃখ ও সুখ । (ভাবে) ডাকলে সুখ আসে দুঃখ, সুখকে ডেকে

দুঃখ পাই ।

সুখ । লোকে মত্ত হয় আমায় পেলে,
 দুঃখ । বলে বাঁচি আমি দুঃখ গেলে ;
 সু ও দুঃখ । সুখ দুঃখ দু'ভাই মিলে, মনের ভিতর খেলতে যাই ॥
 দুঃ । আমি মায়া দেবীর মায়া ;
 সু । আমি শাস্তি দেবীর ছায়া ;
 সু ও দুঃ । মোদের ষারা এড়িয়ে যাবে, তারা শাস্তি পাবে

শুনতে পাই ॥

সুখ । এখন কোথায় যাবে ?
 দুঃখ । যেথায় তুমি র'বে ?
 সুখ । একসঙ্গে নাকি ?
 দুঃখ । তা হয় কি ?
 সুখ । আমি যাব রাজবাড়ী ।
 দুঃখ । তোমার তাড়াতাড়ি, আমার একটু দেয়া ।
 সুখ । ততক্ষণ কোথায় যাবে ।
 দুঃখ । ঐ যে স্নান করে যাচ্ছে ঘরে, এইবার ভগবানকে
 ডাকবে ।
 সুখ । ব্যাচারীকে ভোগাবে ?
 দুঃখ । কি করি—পূর্বজন্মে নিমন্ত্রণ করে রেখেছে ।
 সুখ । তাতেইত মাথা খেয়েছে ।

হুঃখ । কি করি বল, মাগী কোপালেই ফসল কেউ পায় না, গাছ বেরুতে দেবী হবে । তবে পরজন্মে তোমায় পাবে ।

সুখ । এখন চল, কোন দিকে তুমি যাবে ?

হুঃখ । তোমার উল্টো দিকে ।

সুখ । তবে যাও, আমিও যাই ।

হুঃখ । আ'ম'ও কি আর দাঁড়াই ?

উভয়ের উভয়দিকে প্রশ্নান !

— — —

পঞ্চম দৃশ্য ।

রাজস্তুপুর সংলগ্ন গৃহ-দেবতার মন্দির সঙ্খ ।

মন ও বুদ্ধি ।

বুদ্ধি । একি মহারাজ, আপনি এত হাঁপাচ্ছেন কেন ? আপনি কি অসুস্থ ?

মন । না না মস্ত্রি, এটা হচ্ছে আমোদের একটা অঙ্ক আমোদ কলেই হাঁপাতে হয় । মস্ত্রি, আমোদ কি রকম বুঝতে পারলে না ? এতে পাগল করে দেয়, হাঁপায়, লাফায়, কাঁপায়, নাচায়, গাওয়ায়, হাসায়, কাঁদায়, এ যে না করে, সে বুঝতে পারে না — কাকেও বোঝান যায় না ।

বুদ্ধি । তাহঁতো মহারাজ, এতে তাহঁলে কষ্টও আছে ?

মন । এ আর কষ্ট কি ? একে কষ্ট বলে না ; ফুল তুলবে কাটা ফুটবে না ? মাছ ধরবে কাদা লাগবে না ? এও তাই, ঠিক তাই ।

(সূথের প্রবেশ ।)

সূথ ! মহারাজ, অভিবাদন করি ।

মন । কে তুমি ছোকরা ?

সূথ । আজ্ঞে মহারাজ আমি সূথ, আপনার নিকট থাকতে এসেছি ।

বুদ্ধি । তুমি কোথায় থাক ?

সূথ । ষেথায় যখন সময় হয় ।

বুদ্ধি । এখন কি এখানে সময় হয়েছে ?

সূথ । আজ্ঞে হ্যাঁ ।

মন । তা হলে তুমি কি এখানে বরাবর থাকবে ?

সূথ । আজ্ঞে না, বরাবর আমরা কোথাও থাকি না ।

মন । তোমার বদলে তখন কে থাকবে ?

সূথ । আমার একটি বৈমাত্রেয় ভাই আছে সে থাকবে ।

মন । তার নাম কি ?

সূথ । দুঃখ ।

মন । (শিহরিয়া) ও বাবা, দুঃখ তোমার ভাই ?

সূথ । হ্যাঁ মহারাজ সত্যই তাই ।

মন । তাহঁত, আগে সূথ, শেষে দুঃখ !

সুখ । মহারাজের ও তাই, তা সে ত ভাল কথা ।

মন । বুঝতে পারুঁম্ না

সুখ । মহারাজ, আগে আমায় রাখুন, ক্রমে সব বুঝতে পারবেন ।

মন । কি বল মন্ত্রি, ছোকরা চালাক আছে খুব ; বেশ,—তুমি আজ থেকে বাহাল হলে ।

সুখ । যে আজ্ঞে । (মনকে ফুল ইত্যাদি দিয়া সাজাইল) ।

মন । তুমি অন্তঃপুরে রাণীর নিকট থাকবে, কেবল আমায় অন্তরের সংবাদ এনে দেবে ।

সুখ । যে আজ্ঞে ।

মন । চল, তোমাকে রাণীর কাছে পরিচয় করে দিই ।

(সুখকে লইয়া মনের প্রস্থান ।)

(অন্য দিকে বৃদ্ধির প্রস্থান ।)

(রতির প্রবেশ ।)

রতির গীত ।

ঢাল কাম, কলুষ ঢাল যদি হে মানবে উদয় ।

আমি যে অবলা, রতি বিহ্বলা, বলনা এ জালা আর কত সয় ?

প্রবৃষ্টি জাগিলে কি ভাবনা আর, নিবৃষ্টিরে সবে করে পরিহার ;

মনোবৃষ্টি তার তোমায় বিহার, আমারে বাসনা হৃদয়ময় ।

এস সখা এস, হৃদয়েতে ব'স হ'ল হে মানব হৃদয় জয় ।

(মনকে প্রলুব্ধ করিয়া গাইতে গাইতে রতির প্রস্থান ।)

(বেগে মনের পুনঃ প্রবেশ ।)

মন । কে গান গাইলে ? কোথায় গেল ?

(কুমতীর প্রবেশ ।)

কুমতি । ঐ যে ঐ দিকে, বড সুন্দরী, যাও না, ওকে ধর না ।

মন । ধোরুবো ? ধরা দেবে কি ?

কুমতি । না ধরা দেয়, জোর করে ধর, তুমি রাজা, তোমার সব, তুমি সব উপভোগ করবে ।

মন । তবে যাই, কি বল ?

কুমতি । হ্যাঁ, দেবী কোরো না । ঐ গান শোনা যাচ্ছে ঠিক ধোরো, আগে ভাল করে বুঝিয়ে বল, না শোনে চুলের মুঠি ধবে নিয়ে এস ।

মন । যদি চোঁচায়, যদি গোল করে, যদি কেউ এসে পড়ে ?

কুমতি । তুমি শুনবে কেন ? বল্লম্ ত তুমি রাজা, কে তোমায বাধা দেবে ? কার সাধ্য ? যাও, দেখছি তোমার সাহস কম । এস, এই মদিরা পান কর, সাহস হবে, অসাধ্য যা ভাব ছ, তা সাধ্য হবে ।

মন । তাই দাও ।

কুমতি । এই লও । (মদিরা প্রদান ।)

আর দেবো ?

মন । দাও । (পান করণ ।)

কুমতি । . আর দেবো ?

মন । দাও । (পুনঃ পান ।)

কুমতি । আবার দেবো ?

মন । দাও । (পুনঃ পান ।) ব্যাস্ : এইবার ষাব, এইবার ষাব, এইবার ধোরুবো, কে বাধা দেয় দেখি, ঐ গান শোনা যাচ্ছে ।

কুমতি । হ্যাঁ যাও, আমি তোমার সঙ্গে সঙ্গে আছি, তোমার ভয় কি ? আমি তোমায় পথ দেখিয়ে নিয়ে ষাব, চল ।

মন ! বাঃ, বাঃ, আমি রাজা, আমার পুত্রেরা সকলে এক এক জন ধনুর্ধর, কাম, ক্রোধ, লোভ । সেনাপতি অহঙ্কার, মন্ত্রী বুদ্ধি, রাণী প্রবৃত্তিদেবী আর উপদেবী কুমতি আমার সহায় । সতি তো আমার অসাধ্য কিছু নয়, চল কুমতি তোমার সঙ্গে ষাই ।

(কুমতি ও মনের প্রস্থান ।)

(পূজার উপকরণাদি হস্তে ধর্ম ও নিষ্ঠার প্রবেশ ।)

নিষ্ঠা । কি গো, নৈবিদ্য নিয়ে কোথায় যাচ্ছ ?

ধর্ম । রাজার মন্দিরে ।

নিষ্ঠা । কেন ?

ধর্ম । রাজার হোয়ে পূজা কর্তে যাচ্ছি ।

নিষ্ঠা । তা আমাদের কি নৈবিদ্য দিতে হবে ? রাজার কি ক্ষমতা নেই ?

ধর্ম । রাজা পূজা বন্ধ করেছে, কোন খরচ দেয় না, কিন্তু রাজা এখন উন্মত্ত হয়েছে । আমি যে ঠাঁর পুরোহিত । আমি কি করে পূজা বন্ধ কোরবো ?

নিষ্ঠা । কিন্তু এমন করে ঘর থেকে খরচ করে, তুমি আর কতদিন পূজা চালাবে ?

ধর্ম । যতদিন পারি আমারও কি একটা কর্তব্য নেই ?

নিষ্ঠা । তা রাজা যদি পূজা কর্তে বারণ করে থাকে তো পূজা করা কেন ?

ধর্ম । তা নয় রে তা নয় পাগলি, রাজা ছেলে হওয়া অবধি উন্নত হয়ে বেড়াচ্ছে, লোক জন তাই কেউ কাউকে মানে না । পূজার উপকরণ আর কেউ দেয় না, সকলে লুটপাট নিয়েই ব্যস্ত । আমি পুরোহিত, এই পুরের হিত করা আমার কাজ, নিত্য সেবা হয়, তাই বাড়ী থেকে পূজার উপকরণ নৈবিদ্যা ইত্যাদি নিয়ে দেবতার পূজা কর্তে যাচ্ছি । ছাড়্, পথ ছেড়ে দে বেলা হ'য়ে গেল ।

(পুরোহিতের প্রস্থান ।)

(রতির গানের সুর শোনা গেল)

নিষ্ঠা । তাই ত, রাজা ত এমনটি চিরদিন ছিলেন না—কেন এমন হলেন ?

মন্দির সম্মুখে আসিয়াই রতি ক্ষিপ্ৰগতিতে গান করিতে করিতে

মনকে প্রলুব্ধ করিয়া তখনই অন্য দিকে চলিয়া গেল । নিষ্ঠা

একটু বিচলিত হইয়া সেদিকে চাহিয়া রহিল ।

(টলিতে টলিতে মনের পুনঃ প্রবেশ ।)

সঙ্গে সঙ্গে কুমতি আসিয়া একটা কুটিল চাহনি চাহিয়া
মনকে ইসারা করিল নিষ্ঠাকে ধরিতে ।

মন । বাবা, খুঁজি খুঁজি নারি, যে পায় তারি, কি সুন্দরি,
গান বন্ধ করলে কেন চাঁদ ? ওকি, আমায় দেখে যে একেবারে
আড়ষ্ট ? বেড়ে গান ধরে এদিক্ ওদিক্ লুকোচুরী খেল্ছ, এইবার
ত ধরা পড়েছ চাঁদ ।

নিষ্ঠা । ওমা ! এ যে দেখছি, রাজা মদ খেয়ে নেশায় ভোর ।
পাগলের মত কি আবোল তাবোল বক্ছে !

মন । কি চাঁদ কি মস্তুর আওড়াচ্ছ ? রাজি না নিমরাজি,
খুলে বল চাঁদ ? আমি রাজা দেখ্ছো, আমার যা খুসী তাই করুব",
কেউ রুকতে পারবে না বুঝলে ? ভাল চাও তো চাঁদ বকে এসে
ঝাঁপিয়ে পড়', তোমার পেছনে পেছনে ছুটে ছুটে আমি হাঁপিয়ে
পড়েছি ।

নিষ্ঠা । আজ্ঞে মহারাজ, আপনি কি বলছেন ? আমি
আপনার পুরোহিত-পত্নী ?

মন । তা পুরো পেত্নীই হও, আর অর্ধেক পেত্নীই হও, আজ
আর ছাড়ান নেই ।

নিষ্ঠা । (স্বগতঃ) এ বলে কি গো, রাজার ভীমরক্তি হোল
নাকি ? (প্রকাশ্যে) পথ ছেড়ে দিন, আমি বাড়ী যাই ।

মন । চল আমি কোলে করে রেখে আসি, নৈলে চরণে ব্যথা
লাগবে চাঁদ । গান ছেড়ে যে বেয়াড়া তান ধরলে প্রেমসি ?

নিষ্ঠা। ওগো কে কোথায় আছ আমার রক্ষা কর ।

মন। কার বাবার সাধ্য যে এখানে আসবে, আর কেন ভোগাও, এস চাঁদ । তোমায় হৃদয়ে না ধ'বুলে এ জালা মিটছে না । বুঝ না চাঁদ, ভেতরে গরল ফুটছে ? দেখছ না, চোকুদে নাকুদে আগুনের ঝলকা বেরুচ্ছে ? না দেখছি সহজে হবে না, আচ্ছা বাবা তাই হোক—

(অগ্রসর হইয়া হস্ত ধারণ ।)

নিষ্ঠা। কে আছ, আমার রক্ষা কর,

(নেপথ্যে “ভয় নেই, ভয় নেই ।”)

(ধর্মের পুনঃ প্রবেশ ।)

ধর্ম। একি রাজা উন্মত্ত হ'য়ে আমার স্ত্রীকে আক্রমণ কচ্ছে । (হাত ছাড়াইয়া দিয়া, মনের ও নিষ্ঠার মাঝে দাঁড়াইয়া) মহারাজ, মহারাজ, প্রকৃতিস্থ হোন ; একি ! কুলকামিনীর প্রতি অত্যাচার কর্তে উত্তত হোয়েছেন ?

মন। কে বাবা টিকিদাস ? শাস্ত্র শোনাতে এসেছ ? এখানে রতিশাস্ত্রের আলোচনা হ'চ্ছে. একটু ঘুরে এস বাবা । দেখছো না হাত জোড়া, এখানে কিছু হবে না ।

(মন পুনরায় নিষ্ঠাকে আক্রমণ করিতে উদ্যত)

ধর্ম। মহারাজ, আমি আপনার পুরোহিত, আপনার মঙ্গলের জন্য নিত্য পূজা করে থাকি, আমার উপর অত্যাচার কোরবেন না । (মন পুনরায় নিষ্ঠার হস্ত স্পর্শ করিতেই, পুরোহিত

হাত ছাড়াইয়া দিয়া) সতীর অপমান কোরবেন না । (পুরোহিত নিষ্ঠাকে আড়াল করিয়া দাঁড়াইল)

মন । (অত্যন্ত ক্রুদ্ধ হইয়া) বড় যে চ্যাটাং চ্যাটাং বল্ছ বুড়াইয়ার—জান কে আমি ? আমি রাজা, আগে আমার ভোগ চাই, তারপর পেসাদ পেও । (হঠাৎ গলার সুর বদলাইয়া) ভট্‌চাজ, ব'লে ক'য়ে রাজী করাও—পুরস্কার পাবে । কেন বাবা গোল কর, আমার ইচ্ছা কখনও অপূর্ণ থাকবে না, বুঝলে ? না পেরে থাক সরে পড়' । (পুনরায় ঘুরিয়া নিষ্ঠাকে আক্রমণ করিতে গেল ।)

ধর্ম । (স্বগতঃ) তাইতো, এই নরাধম দেখছি কিছুতেই কথা শুনবে না । মদিরায় উন্মত্ত হ'য়ে গুরুপত্নী হরণ কর্তে প্রস্তুত । ব্রহ্মণ্যদেব, বল দাও, (সবলে রাজার হস্ত হইতে পত্নীকে ছাড়াইল মন ছিট্‌কাইয়া পড়িয়া গেল) নরাধম, নরকের কাঁট, তোমার এতদূর অধঃপতন হয়েছে ? নিষ্ঠা, সাধবা, তুমি পালাও, আর তিলান্ন এখানে থেক' না ।

(নিষ্ঠার প্রস্থান ।]

মন । (উঠিতে চেষ্টা করিয়া) বটে, এতদূর স্পর্ধা ? কে আছ ?

(অহঙ্কারের প্রবেশ ।

অহঙ্কার । মহারাজ !

মন । এই টিকিদাস বেটাকে বাধ, পিছগোড়া ক'রে বাধ ।

(অহঙ্কার কর্তৃক তথা করণ)

আমার কাছে নিয়ে এস ।

(অহঙ্কার কর্তৃক তথা করণ)

মন । (টিকি ধরিয়া) কি বাবা নড়না যে, এইবার টিকি ধরে
ঝুলিয়ে রাখি, কি বল ? আমার মুখের গ্রাস কেড়েছ ? এইবার
কি হাল হয় দেখ, (অহঙ্কারের প্রত্নি) যাও একে ঐ বৃক্ষে বন্ধন
কর, ওর স্ত্রীকে ধরে আনতে লোক পাঠাও, ওর সামনে নীচ লোক
দিয়ে ওর স্ত্রীকে অপমান কর ও স্বচক্ষে তা দেখুক, তারপর ওর
ছিন্ন মুণ্ডু এনে আমায় দেখাও, যাও ।

(ধর্মকে লইয়া অহঙ্কারের প্রস্থান ।)

আঃ আবার মন্ত্রী আসছেন, যত বাগড়া এই সময় ।

(বুদ্ধির প্রবেশ)

বুদ্ধি । মহারাজ, পুরোহিতকে বন্ধন করলেন কেন ?

মন । আমার খুসি ।

বুদ্ধি । পুরোহিত, পুরের হিতকারী—

মন । তা বেশ জানা গেছে, পুরের হিতকারী হোক আর নাই
হোক, আমার খুব হিতকারী বটে ।

বুদ্ধি । আজ কয় দিন হ'তে রাজকোষ শূন্য, এমন কি গৃহ-
দেবতার পূজার উপকরণ ব্রাহ্মণ নিজ হ'তে দিয়ে পূজা চালাচ্ছেন ।

মন । আজ হ'তে এ পুরীতে পূজা টুজা চলবে না । গৃহদেবতা,
গৃহদেবতা কেবল ব'সে ব'সে খাবেন, কেন কিসের গৃহদেবতা ! এই
সব বাজে খরচেইতো রাজকোষ শূন্য হ'য়েছে । দেখ, আজ থেকে

পূজার ঘরে তালা বন্ধ কর, কেউ যেন সেখানে প্রবেশ না করে, যাও, আবার দাঁড়িয়ে কেন ?

বুদ্ধি । আজ্ঞে, যাচ্ছি মহারাজ, অন্যান্য খরচ পত্রেরও টানাটানি, রাজকোষ অর্থশূন্য ।

মন । রাজকোষ অর্থশূন্য ! প্রজারাত অর্থশূন্য নয় ? তুমি যাও আমি তার ব্যবস্থা করিচি ।

(বুদ্ধির প্রশ্নান ।)

সবাই যেন আমার পাগল ক'রেছে ; মনে কবলুম্ পুত্র হ'য়েছে, তাহাদের উপর রাজ্যভার দিয়ে কেবল আমোদ উপভোগ ক'রুব, তা নয়, রাজকোষ শূন্য, গৃহদেবতার পূজা বন্ধ, তা আমি কি করুবো ?

(সুখের প্রবেশ ।)

তোমার আবার কি সংবাদ ?

সুখ । রাজপুত্রেরা সংবাদ দিলেন যে একজন পুত্রহীন ধনাঢ্য প্রজা তীর্থ পর্যটনে যাবে, সে তার সর্বস্ব রাজভাণ্ডারে জমা রাখতে চায়, যদি সে বেঁচে ফিরে আসে, তবেই তার ধন সে ফিরে পাবে, নচেৎ রাজাই সে ধনের অধিকারী । কোটি স্বর্ণমুদ্রা সঙ্গে এনেছে ।

মন । বটে, বটে, । এ যোগাযোগ কে করলে বল'ত ?

সুখ । আজ্ঞে মহারাজ আপনার তৃতীয় পুত্র ।

মন । লোভ ? বাঃ চমৎকার ছেলে, বাহাদুর ছেলে, সোনার চাঁদ ছেলে, যাও, মন্ত্রীকে বল, তার রক্ত সব রাজভাণ্ডারে জমা

রাখুক । আর, আমার মোহারাক্তিত রসিদ তাকে দিতে বল ।
আর দেখ, চুপি চুপি সেনাপতিকে পাঠিয়ে দাও তো ? দেখ সুখ,
তুমি বড় ভাল ছেলে, ভারী পয়মস্ত, তুমি এসে আমার বাড়বাড়ন্ত
হ'য়েছে, তোমাকে আমি খুব খুসী কোরবো, আর কত দিন এখানে
থাকবে ?

সুখ । আর বেশী দিন নয় ?

মন । আচ্ছা, এখন যাও, আমি তোমায় খুসী ক'রবো, সে
মনে থাকবে ।

(সুখের প্রস্থান ।)

না, সুখ, ছোকরা ভাল, ছোকরা ভাল, ভারি পয়মস্ত ।

অহঙ্কারের প্রবেশ ।

অহঙ্কার । মহারাজ কি আমায় স্মরণ করেছেন ?

মন । হ্যাঁ শোন, তোমার সঙ্গে পরামর্শ ক'রতে হবে, দেখ,
একজন ধনবান্ প্রজা কোটা স্বর্ণমুদ্রা রাজভাণ্ডারে জমা রেখে, তীর্থ
যাত্রা ক'রছেন, অর্দ্ধপথে তাকে বিনাশ কর্তে হবে, বুঝলে ?
রাজকুমার লোভ তাকে এনেছে, তুমি গেলেই তাকে দেখতে
পাবে ; তার সঙ্গে নাও । বুঝলে, টাকা আর না ফিরিয়ে দিতে হয়,
ভাণ্ডারে টাকার বড় অভাব ।

অহঙ্কার । যে আজে—

মন । আর দেখ সেই টাকিদাস বেটার স্বাক্ষরে ক'রতে কাকে
পাঠিয়েছ ? তারা কি তাকে ধরেছে ?

অহঙ্কার। আজ্ঞে তাকে পাওয়া যাচ্ছে না, বোধ হয়, সে রাজ্য ছেড়ে পালিয়েছে।

মন। আচ্ছা, আমি তার ব্যবস্থা করছি, তুমি যাও।
ব্যাস, অনেকটা নিশ্চিন্ত।

(বিবেকের প্রবেশ।)

মন। ঐক! তুমি সহসা কোথুথেকে এলে। তোমায় ত ডাকিনি।

বিবেক। আমায় কেউ ডাকে না, আমি আপনিই আসি। পিতঃ, আজকের ঘটনায়ও কি আপনার জ্ঞানচক্ষু উন্মিলিত হবে না? আপনি পুত্র হ'য়েছে বলে উন্নত হ'য়েছেন—ও পুত্র নয় শত্রু, সমস্তই মায়া। ঐ মানস-উদ্ভূত পিতৃদ্রোহী পুত্রলাভ করে উন্নত পিশাচবৎ কামোন্মত্ত হ'য়ে আজ আপনি গুরুপত্নী হরণ কর্তে গিয়েছিলেন, ক্রোধে হিতাহিতজ্ঞানশূন্য হ'য়ে ব্রাহ্মণ বধের আদেশ দিয়েছেন, আর লোভে অন্ধ হ'য়ে পরম হরণ করেও আপনার তৃপ্তি নাই, অর্থ লোভে গচ্ছিতকারীর মৃত্যুর ব্যবস্থা কর্তেও আপনি দ্বিধা করেন নি, আপনাকে ধিক্।

মন। তাইতো, তুমি যে বড় বড়া কথা বলছ দেখছি।

বিবেক। বল না? একবার ভেবে দেখুন দেখি, আপনি কি ছিলেন আর কি হ'য়েছেন? আকাশের শ্রায় নিখল ছিলেন, এখন মল পরিপূর্ণ পৃতিগন্ধময় বায়ুর শ্রায় দূষিত হ'য়েছেন। আপনি রাজা বলে অভিমান করেন, আপনার রাজ্য কোথায়? কয়দিনের

জন—তাকি একবার ভেবে দেখেছেন ? পুত্র পরিজন এ সবই মায়া, ভৌতিক ইন্দ্রজাল মাত্র, কেউ আপনার সঙ্গে যাবে না মহারাজ, অধিক আর কি বলব, আপনার জন্ম বড় দুঃখ হয় তাই আসি। নইলে এরূপ নারকীয় ব্যাপারের অনুষ্ঠানকারীর মুখদর্শন পর্য্যন্ত কর্তে নাই !

মন। আচ্ছা, আচ্ছা. থাক, থাক, বেশ বক্তৃতা করেছ। শোন দেখি, তোমায় একটি কথা জিজ্ঞাসা করি, তুমিত বন্দী ছিলে, কি করে এখানে এলে ?

বিবেক। আমাদের কি কেউ বন্দী কর্তে পারে ?

মন। তোমার মাও কি তোমার মত বেড়িয়ে বেড়ান।

বিবেক। না, তিনি আপনার আশাপথ চেয়ে কুটীরেই বসে থাকেন, বলেন, “আমার স্বামী একদিন নিশ্চয়ই আসবেন।—যখন পাপের ভরা পূর্ণ হবে, যখন বুঝবেন, রূপের পিপাসা কখনও মিটেনা, লোভে পড়লে লোকের কি সর্বনাশই না হয়, তখন আপনি নিশ্চয়ই সেখানে যাবেন।” মহারাজ, আপনি যে কি চান, তা আমি জানি, কিন্তু আপনি তা পান না ? তার বদলে প্রাণান্তকর গরল পান কর্চেন।

মন। তাইতো, তাইতো, তুমি বলছ মন্দ নয়, একটু বুঝতে হবে, দেখ আমি লুকিয়ে একদিন তোমার মাকে দেখে আস্ব। তুমি এসে আমায় নিয়ে যেও। শুধু দেখে আস্ব। এখন নয়, আজ নয়, সে একদিন আমি ব’লে দেব। এখন আমি যাই, কে কোথা থেকে আবার দেখবে—আমি যাই। আচ্ছা আজ তুমি এস, আমি

চল্লেম, আমি, আমি, আমার—আমার সংসার, আমার পুত্র, যাই
অনেকক্ষণ তাদের ছেড়ে আছি।

(মনের প্রশ্নান।)

বিবেক। (দীর্ঘনিশ্বাস ফেলিয়া) এখনও দেবী আছে।

বিবেকের গীত।

আমি আমি বলে করে ভাব মন।

কে তুমি—তোমার কে আপন ॥

যে আমিতে সেই “আমি” পাবে কর না তার অন্বেষণ।

আমার, আমার—পুত্র-পরিবার ---

আমি কিন্তু কে ঠিকানা নাই তার ;

পঞ্চভূতে আমায় দিয়েছে আকার,

দিয়ে নিতে তার কতক্ষণ ॥

তখন আমি কোথা যাবে, অনন্তে যিশাবে,

অনন্তই রবে নিদর্শন !

বিমনা হোয়ো না, বিপথে যেও না,

সে পথে পাবে না নিত্যধন।

চল সত্য পথে বিবেকের সাথে,

হৃদয়ে হেরিবে নব বুদ্ধাবন।

— —

(বিবেকের প্রশ্নান)

দ্বিতীয় অঙ্ক

প্রথম দৃশ্য

মনের বহির্কীর্টা ।

কাম, ক্রোধ ও লোভ ।

কাম :

বাসনায় যেমন জীবের সৃজন,

সেইরূপ প্রবৃত্তি সংযোগে

মনের ইচ্ছায় জনম মোদের ।

তিন ভাই ক্রমান্বয়ে জন্মেছি সবাই ।

করেছিল কামের বাসনা,

পুরেছে কামনা,

কামরূপে জন্মিয়াছি আমি ।

অভিন্ন হৃদয় ক্রোধের উদয়

হ'ল অতঃপর ।

ক্রমে রাজা লোভেতে পড়িল,

লোভ জনমিল,

তিন ভাই মিলিলু এ পুরে ।

এবে রাজা উন্মত্তের প্রায় মোদের সেবার,

ভ্রমিছে ধরায় অবিরত ;

কামে অবসন্ন, ক্রোধে জ্ঞান শূন্য,

লোভে আত্মহারা রাজা

রাজ কার্যে দিয়া জলাঞ্জলি ।

ভ্রমে শুধু রিপু তাড়নায়

ক্রোধ । কহ এবে কি কার্য মোদের ? এখনও বিবেক আসি

দেখা দেয় রাজার হৃদয়ে ।

ক্রোধে জ্ঞান শূন্য রাজা,

ব্রাহ্মণের বধ আজ্ঞা দিল,

বিবেক পৌঁছিল,

সব পণ্ড হ'ল,

বুখা জন্ম মম, ব্রাহ্মণ পাইল মৃত্যু ।

কহ কি করিলে বিবেক মরিবে,

বুশ্চিক দংশন সম জ্বলিছে হৃদয় মম,

হায় এত করি আধিপত্য রাখিতে নারিনু ।

লোভ । লোভে পড়ি পরস্ব করিল চুরি,

গচ্ছিত রতন করিয়া হরণ,

পুনঃ তারে দিল ফিরাইয়া ।

পর নারী লোভ হইল বিফল,

এ সকল বিবেকের ফল,

এস সবে করিব কৌশল.

যাহে বিবেকের সনে না হয় সাক্ষাত আর ।

চাই পুনঃ আধিকার মোসবার,

বৃদ্ধ রাজা কি করিবে আর,
তিন ভাই করিব শাসন;
এ রাজ্য এখন—
প্রাণ পণ আমা সবা কার ।

কাম । ঐ দেখ মতিচ্ছন্ন মন আসিছেন দুরে ।
সাথে অহঙ্কার কি ভাবনা আর
আমি আমি ব'লে, জ্ঞান শূন্য হ'লে,
কি অসাধ্য রহিবে মোদের ?
চল যাই অন্তরালে,
শু ন কিবা বাসনা রাজার ।

(সকলের প্রস্থান ।)

মন, অহঙ্কার ও বুদ্ধির প্রবেশ ।

বুদ্ধি । আমি বলি, মহারাজ এখন বৃদ্ধ হ'য়েছেন. রাজকার্য্য
কুমারদের হস্তে অর্পণ করুন,—তা হ'লে আপনি নিশ্চিন্তে আমোদ
কর্ত্তে পারবেন । আর কুমারেরাও ত বয়ঃপ্রাপ্ত হ'য়েছেন ।

মন । তুমি যা বলছ সব সত্য মস্ত্রি । কিন্তু ভাবছি রাজ-
কুমারেরা সব এখনও ছেলে মানুষ, সকল দিক্ সাম্লে চলতে
পারবে কি ? দেখ, সেই বিবেক আবার এসেছিল, অনেক কথা
ব'লে গেছে, তাই যেন আমি একটু মুশ্ড়ে গেছি নইলে তুমি কি
মনে কর আমি অক্ষম—তা নয় ।

অহঙ্কার। মহারাজ, সেটা পাগল, সেটা আপনাকে কর্তব্য
ব্রহ্ম করবার চেষ্টা করে।

মন। আচ্ছা সেনাপতি, তার মাকে ত দেখেছ? সে নাকি
এখন বড় সুন্দরী হ'য়েছে?

বুদ্ধি। আরে ছ্যা, ছ্যা তার বয়সের গাছ পাথর নেই, একটা
বুড়ী, রাত দিন তিন মাথা এক ক'রে ব'সে আছে, বলে রাজা
আসবে, তাকে সোহাগ ক'রবে, সে সেই অপেক্ষায় আছে।

মন। বল কি, একটা বুড়ী? আমি মনে করি কত না জানি
সুন্দরীই হ'য়েছে। কিন্তু তার ছেলে বিবেকের ত বেশ চেহারা,
তাই মনে করেছিলুম, সেও এখন বোধ হয় রূপবতী হ'য়েছে; তা
নয়? এঃ, রামচন্দ্র, যা বলেছ সেনাপতি, ঐ বিবেকটা আমার
মাথা খেতেই আসে, এসে কেমন মাথা গুলিয়ে দেয়। সেদিন
তার কথা শুনে প্রাণটায় কেমন অনুতাপ এল, সেই টিকিদাস
বামুনটাকে ছেড়ে দিলুম, মাগীটারও কোন খোঁজ নিলুম না। অত
গুলো টাকাও ছেড়ে দিতে হ'ল। ষাক, বেটাকে আর আসতে
দেব না, বেটা ষাটুকরই বটে, আসে আর তাক লাগিয়ে দেয়।
আমি রাজা, আমায় কিনা উপদেশ দিতে আসে!

অহঙ্কার। তাইতো বলছি মহারাজ, আপনি হ'লেন হৃদয়পুরের
প্রবল প্রতাপাধিত অধিপতি, আপনাকে কিনা একটা ভবঘুরে—চাল
চুলো নেই, বক্তৃতাবাগীশ এসে উপদেশ দেয়? আমি অহঙ্কার—
আপনার সেনাপতি, মহা কৌশলীবুদ্ধি—আপনার মন্ত্রী, স্থির ধৌবনা
মহারানী প্রবৃষ্টি—আপনার পাটরাণী, মহাপরাক্রমশালী কাম,

ক্রোধ, লোভ—আপনার পুত্র । আপনি কি একটা ভবঘুরের কথায় বিশ্বাস করেন ?

মন । আর না সেনাপতি, তোমার কথাই রাখবো । মন্ত্রী, আমি ছেলেদের উপরই রাজ্যভার অর্পণ ক'রবো । তাহিত ! কেন ? আমোদ ক'রবো না কেন ? খালি রাজ্যকার্য, রাজকার্য, —কিসের রাজকার্য ? আমোদ ক'রে নেওয়াই ভাল । আমি রাজা, এ রাজ্যের অধিপতি, আমি ভোগ ক'রবো না ত ভোগ ক'রবে কে ? দাঁড়াও না, আগে ছেলেদের যৌবরাজ্যে অভিবিক্ত করি, তারপর প্রাণভরে আমোদ ক'রবো । কেবল আমোদ, কেবল ভোগ, কেবল আমোদ, কেবল ভোগ । এই কে আছিস, কুমতি সঙ্গিনীদের পাঠিয়ে দিতে বল ।

কুমতি সঙ্গিনীদের প্রবেশ ।

গীত ।

এ কি আল্গা বাঁধন অমনি খুলে যাবে ?

এতে দুঃখ পেলেও তবু সুখ মনে হবে ॥

ছাড়ি ছাড়ি তবু ছাড়িতে পাবে না,

ছাড়িলে বাঁচবে, ছাড়িতে পার না ;

বারে বারে, তাই করি আনাগোনা—

এত সুখ বধু আর কোথা পাবে ॥

কি হবে কি হবে, ভেবে কিবা হবে,

যাতো মনঃসুখে কেন মনোদুঃখে হবে ॥

(কুমতি সঙ্গিনীদের প্রস্থান)

কাম, ক্রোধ ও লোভের প্রবেশ ।

মন । এস, এস, আমি তোমাদের ডাক্তে পাঠাব মনে করে-
 ছিলুম । দেখ কাম, তোমরা সব বড় হ'য়েছ, এখন তোমরাই সব
 রাজকার্য্য পরিচালনা কর,—আমার দ্বারা আর ওসব রাজকার্য্য করা-
 সম্ভব হবে না । তাই স্থির ক'রেছি তোমাদের এই হৃদয়পুরের আধি-
 পত্য প্রদান ক'রে, আমি বিশ্রামসুখ লাভ ক'রবো । আজিই শুভদিন,
 আজিই আমি তোমাদের অভিষেক কার্য্য সম্পন্ন কর্তে চাই । দেখ
 কাম, দেখ ক্রোধ, দেখ লোভ, এ রাজ্যে তোমাদের সম্পূর্ণ অধিকার,
 নির্বিঘ্নে রাজ্যশাসন কর । আমায় অবসর দেওয়া তোমাদের
 উচিত । এখন তোমাদের পুত্র, মোহ, মদ ও মাংসখ্যাকে নিয়ে
 নৈরাশ কাননে ক্রীড়া করে দিন কাটাবো স্থির ক'রেছি । সেনাপতি,
 তুমি অস্ত্রপুরে গিয়ে রাণীকে সংবাদ দাও যে আজিই রাজকুমারেরা
 অভিষিক্ত হবেন । মন্ত্রী, এই সব রাজকুমারদের আজ থেকে তুমিই
 অভিভাবক হ'লে, কামকে রাজকার্য্যে সুশিক্ষিত ক'রবে, ক্রোধকে
 কাত্রবিঘ্নায় পারদর্শী ক'রবে, আর লোভকে অর্থশাস্ত্রে সুপণ্ডিত
 ক'রে তুলো, তা হ'লে এই হৃদয়পুরে আর কোন ভাবনাই থাকবে
 না । চল বৎসগণ, তোমাদের সিংহাসনে বসিয়ে আমি নয়ন মন
 চরিতার্থ করিগে ।

(সকলের প্রস্থান)

দ্বিতীয় দৃশ্য ।

নৈরাশ-কাননস্থ মনের বাটি ।

মোহ, মদ ও মাৎসর্য্য ।

গীত ।

সকলে । বাঃ বাঃ বাঃ কি মজা কি মজা কি মজা !

আমাদের সঙ্গে সঙ্গে ঘুরছে ফিরছে মন রাজা ॥

মোহ । আমি কামের পুত্র তাঁরই অগ্রদূত,

মোহে পড়ে মন রাজার হয় বেজায় কামের জুত্ ।

সকলে । সবাই মিলে হাসাই কাঁদাই সয়ে যায় দই যে সাজা ॥

মদ । মদ গর্কের মস্ত হলে মন, জ্ঞান থাকে তার কতক্ষণ,

আমায় বলে ক্রোধের ছেলে অহঙ্কারের আকর্ষণ ;

সকলে । তাই সকলে মিলে জুলে করি তার হাড় ভাজা ভাজা ॥

মাৎসর্য্য । আমি মাৎসর্য্য লোভের বংশ ;

করি মনের বিবেক ধ্বংস ।

সকলে । কাণে ধরে উঠাই বসাই সাজাই তারে সং সাজা ।

(গাহিতে গাহিতে সকলের প্রস্থান)

মনের সহিত মোহের পুনঃপ্রবেশ ।

মোহ । দাদা মশাই !

মন । কি দাদা ?

মোহ । আমি ঘোড়া চ'ড়বো ।

মন । চড়না দাদা ।

মোহ । সে ঘোড়া নয়, তুমি ঘোড়া হ'বে, আমি তোমার উপর চড়বো ।

মন । বল কি ? আমি ঘোড়া হব ! আমি যে ভাই রাজা !

মোহ । হ্যাঁ, বাবা ত রাজা হ'য়েছে, তুমি আবার রাজা কিসের ! ঘোড়া হবে না ? যাই ঠাকুরমাকে বলে দিইগে ?

মন । না না না ঘোড়া হচ্ছি । (মনের ঘোড়া হ'ল) ।

মোহ । আমি চড়ি !

মন । চড় ।

মোহ । (চড়িয়া) হেঁট ঘোড়া হেঁট, চল না ।

মন । আবার চলতে হবে ?

মোহ । চ'লতে হবে না, আমি বুঝি শুধু শুধু চড়ে থাকবো ?
দাঁড়াও একটি লাগাম আর একটি চাবুক আনি ।

মন । লাগাম চাবুকে কি হবে ?

মোহ । তা হ'লেই ঠিক হবে, লাগাম ধরে টানলে মোড় ফিরবে, আর চাবুক মারলে দৌড়াতে পারবে ।

(মোহের প্রস্থান)

অপর দিক দিয়া মদের প্রবেশ ।

মদ । দাদামশাই ।

মন । তোমার আবার কি ?

মদ । তুমি এস'ত, পাংশের বাগানে, মাগী গুলো জল নিতে এসেছিল, আমি তাদের কলসী ভেঙ্গে দিয়েছি, তারা আমার বকলে ? চলত' দাদামশাই ইট মেরে মাগীদের মাথা ভেঙ্গে আসি ।

মন । তাদের কলসী ভাঙলে, আবার মাথা ভাঙবে ?

মদ । ভাঙবো না ? তুমি যাবে কিনা বল ? যাবে না ? যাই ঠাকুরমাকে বলিগে দাদামশাই আমার একটি কথাও শোনে না ।

মন । না দাদা, চল মাথা ভেঙ্গে আসি ।

(মন ও মদের প্রস্থান)

মাৎসর্যের প্রবেশ ।

মাৎসর্য । ওদের বাগানে কেমন আমগুলো পেকে টুসটুস করছে, আমাদের পাঁচিলের ধারেই গাছ, দাদামশাই কোথা গেল !

মনের পুনঃপ্রবেশ ।

এই যে দাদামশাই ! আমি তোমায় খুঁজছি ।

মন । কেন তোমার আবার কি প্রয়োজন ?

মাৎসর্য । দেখ দাদা, ঐ গাছে কেমন আমগুলো পেকে রয়েছে, আমি নেব ।

মন । ও যে পরের জিনিষ দাদা ।

মাৎসর্য । হ'লেই বা পরের জিনিষ, ওরা' ত গরীব লোক, ছোটলোক, ওরা আমাদের কি ক'রবে ? আমি নেব ।

মন । (স্বগত) এ শালা লোভের পুত্র কিনা ! (প্রকাশে)
তা আমায় কি কর্তে হ'বে ?

মাৎসর্য্য । তুমি ঐ পাঁচিলের ধারে দাঁড়াও—আমি তোমার
কাঁধে চড়ি ।

মন । কেন, আমি একটা মই নিয়ে আসি না ?

মাৎসর্য্য । না, না, মই চাই না, তুমি দাঁড়াবে কিনা বল,
নইলে আমি ঠাকুরমাকে বলে দিইগে ।

মন । না, না, আর বলতে হবে না, চল আমি দাঁড়াচ্ছি ।

(প্রাচীরের নিকট মন দাঁড়াইল, মাৎসর্য্য মনের স্বক্লে উঠিয়া
ফল লইয়া প্রস্থান করিল ।)

মন । শালারা আমায় যেন পাগল করে তুলেছে, আমি রাজা,
আমার দুর্দশা দেখ ! তিন পুত্রকে রাজ্যপাট ছেড়ে দিয়েছি: তিন
শালা নাতিকে নিয়ে মনের স্মৃথে বেড়াব মনে করেছিলুম, তা শালারা
যেন আমায় চরকা ঘুরণ ঘুরিয়ে নিয়ে বেড়াচ্ছে ? নিঃশেষ ফেলতে
সময় দেয় না । কোন শালা বলে ঘোড়া হও, কোন শালা বলে
ম্যাড়া হও, শালারা আমার উপর দিয়ে চিড়িয়াখানার সাধ মিটিয়ে
নেয় । আচ্ছা, ক'দিন আর সেই বিবেককে দেখতে পাচ্ছি না
কেন ? তার কি কোন অসুখ বিসুখ হ'ল । ঐ না কে আসছে,
তাইত, এ কে রে ! কুকুমাথা, কুকু চুল, গায়ে যেন খড়ি উঠছে,
দেখে ভয় পায় ! তুই কে রে, কি চাস ?

দুঃখের প্রবেশ ।

দুঃখ । মহারাজ, আমি সুখের ভাই দুঃখ, সে চলে গেছে, আমি তার জায়গায় কাজ কর্তে এসেছি ।

মন । এঁা ! সুখ চলে গেছে ! কখন গেল আমার ব'লেও গেল না ।

দুঃখ । আজ্ঞে সে ঐ রকম, কখন যায় কখন আসে, কেউ টের পায় না ।

মন । তাইতো, চলে গেল ! সে বড় পয়মস্ত ছিল হে । তা তুমি তার কি হও বললে ?

দুঃখ । আজ্ঞে আমি তার ভাই, সে যেথায় যায়, আমিও সেথায় যাই, তবে দুদিন আগে আর পিছে ।

মন । তাই বুঝি তুমি এসেছ ?

দুঃখ । আজ্ঞে হাঁ, এখন আমার তাড়ালেও যাব না, আমার ভাই না এলে আমার যাবার উপায় নেই । এখন আমার প্রতি কি আশ্রয় হয় ?

মন । তা যখন এসেছ দুদিন থাক, না থেকে'ত আর যাবে না ? থাক, রাজ বাড়ীতে জায়গার ত অভাব নেই । তবে কি জান, এখন আর আমি রাজা নই, রাজ্য পাট ছেলেদের ছেড়ে দিয়েছি,, আমার কাছে এখন থাক, ছেলেদের ব'লে কয়ে পরে মাহিনা ক'রে দেব ।

দুঃখ । আমরা বিনা বেতনে কাজ করি ।

মন । ওহো সুখও তাই বলে ছিল বটে, তাকে পুরস্কার দেব

বলেছিলাম, সে তাও না নিয়ে চলে গেল। তা থাকো না, অমনি থাকবে, মাহিনা নেবে না, এতে আমার ছেলেরা ভারী খুসী হবে। কি জান এখনকার ছেলেরা বড় হিসেবী, বিশেষ আমার ছোট ছেলে লোভ, ভারী ছসিয়ার, চাকর বাকরদের মাহিনা-থেকে কত টাকা কেটে বার ক'রে; তার হাতেই সব, সেই হিসেব রাখে।

দুঃখ। এখন আমায় কি কর্তে হবে অনুমতি করুন।

মন। তুমিও অন্দরে যাও, তোমার ভাইয়ের কাজ করগে, রাণীকে বলগে যে তুমি সুখের ভাই দুঃখ, তোমার পালা খাটতে এসেছ, যেমন আমায় বোঝালে, তেমন রাণীকে বুঝাও, যাও।

(দুঃখের প্রস্থান)

মন। সুখ গেলেন, দুঃখ এলেন। আসাও যেমন, যাওয়াও তেমন; তিনি এসেছিলেন খপ্ ক'রে, গেলেন ফুস্ করে। ইনিও তো এলেন খপ্ ক'বে, এখন যাবেন কি ক'রে ভা উনিই জানেন। এঁকে দেখেতো বোধ হয় ভাল করেই জানিয়ে যাবেন, কিন্তু সুখ বড় পয়মান্ত ছিল, সে এসেই আমার বাড় বাড়ন্ত হয়েছিল; ইনিই কি করেন তা বিধাতাই—(ভিভ্ কাটিয়া) ঐ যা! আজ আবার মুখ থেকে ও কথা বেরুল কেন? বিধাতা, বিধাতা! বিধাতা কি? বিধাতা কে? বিধাতা থাকলেতো আমার কিছুই থাকে না। না, না, বিধাতা বলে কেউ নেই, সব আপনা-আপনি হচ্ছে—যাচ্ছে।

(নেপথ্যে) বিবেক । বিধাতাই সৃষ্টির মূল, কর্তা ভিন্ন কি কর্ম হয় মহারাজ ?

মন । কে একথা বললে ! বিধাতাই সৃষ্টির মূল ! কর্তা ভিন্ন কর্ম হয় না ! কে তুমি ! কে বললে—

(বিবেকের প্রবেশ ।)

বিবেক । আমি বলেছি পিতা ।

মন । দেখ, আজ হঠাৎ মুখ দিয়ে বিধাতা কথাটি বেরিয়ে গেল ! তুমি ব'লছ বিধাতা আছেন ? কেউ দেখেছে বিধাতা আছেন ?

বিবেক । আপনি দেখেন'নি ব'লে কি কেউ দেখে'নি ? দিনের বেলায় তারা দেখা যায় না ব'লে কি তারা নেই ?

মন । কারকে ব'লতেও তো শুনিনি যে বিধাতাকে দেখেছে ?

বিবেক । কারণ যে দেখেছে, সে বলতে পারে না ।

মন । কেন ! সে কি বোবা হ'য়ে যায় ?

বিবেক । এক প্রকার তাই, এমন ভাষা নেই যে ব্যক্ত করা যায় ।

মন । তুমিও'ত বেশ বোঝাচ্ছ ! তবে কি ক'রে লোকে বুঝবে যে তিনি আছেন ?

বিবেক । যে তাঁকে বোঝবার চেষ্টা ক'রে, সে তাঁর সাক্ষাৎ পায় । তবে তিনি অব্যক্ত, যে বোঝে সে কারকে বোঝাতে পারে না, যেমন বোবার চিনি খাওয়া । অনন্ত শূণ্যের মধ্যে তিনি

অনন্ত চৈতন্য স্বরূপ সুষুপ্ত ছিলেন। তিনি কেঁপে ছিলেন, তাই বায়ু হ'য়েছে, বায়ু হ'তে অগ্নি হ'য়েছে, অগ্নি হ'তে জল, জল হ'তে মেদিনী, একেই পঞ্চভূত বলে। পঞ্চভূত হ'তেই জীবের সৃষ্টি। তবেই দেখুন সেই পঞ্চভূতের মূল যে বস্তু তা কি জীব মধ্যে নাই ?

মন। (চিন্তা করিয়া) আছে।

বিবেক। সমস্ত স্থাবর জঙ্গম হ'তে কীট পতঙ্গাদির পর্য্যন্ত তিতরে তিনি আছেন। তিনি চালান তাই চলে; তিনি বলান তাই বলে, তিনি করান যা, মানুষ তাই করে।

মন। তবে আমি কে ?

বিবেক। তাঁ হ'তে উৎপন্ন, তাঁর প্রতিনিধি, তাঁর দাসানুদাস। এখানে তিনি কণ্ঠা—আপনি নন, সেই চৈতন্যস্বরূপ পরম ব্রহ্ম ব্যতীত আপনার স্বতন্ত্র অস্তিত্ব কিছু নাই।

মন। তুমি দেখছি আমায় বড়ই গুলিয়ে দিলে, আচ্ছা চল, তোমার মাকে দেখে আসি। সেখানে তোমার সঙ্গে পরামর্শ ক'রবো, এস্থান স্নেহের নয়; দেখ, যে দিন থেকে তুমি বলেছ, তিনি আমার প্রতীকায় আছেন, সেইদিন থেকেই ধাব ধাব মনে করি, কিন্তু যেতে সময় পাই না।

বিবেক। যখন ইচ্ছা হ'য়েছে, এইবার যাবেন।

মন। নাতীদের লয়ে বিব্রত, তাদের সন্তুষ্ট না রাখলে ছেলেরা, এমন কি রাণী অবধি ব্যাজার হন।

বিবেক। আমার জননী নিরুত্তি দেবীর আশ্রয় পেলে, আর আপনার কোন বালাই থাকবে না।

মন । চল এখন যাই—(মোহকে আসিতে দেখিয়া) না আর যাওয়া হল না, ঐ আসছে, এবার ঘোড়া হ'তে হবে ।

(মোহের প্রবেশ ।)

মোহ । দাদামশাই চাবুক আর লাগাম এনেছি, এবার ঘোড়া হও ।

মন । এঁা, আজ থাক, আজ বড় বেলা হ'য়েছে, কাল আবার ঘোড়া হবে ।

মোহ । এখুনি ঘোড়া হও, আমি তোমার উপর চ'ড়ে ঠাকুর-মার কাছে যাব, ঠাকুরমা কত খুসী হবে ।

মন । না, না, সেখানে এখন যেও না, তিনি এখন কামনা দেবীর পূজায় ব্যস্ত ; এখন সেখানে গেলে তিনি রাগ ক'রবেন ।

মোহ । আমার ভোলাতে পারবে না, ঘোড়া হও, ঘোড়া হও, নইলে আমি চল্লুম ।

মন । (বিবেকের প্রতি) দেখ, তুমি আজ এস, আবার দেখা হবে, তোমার সঙ্গে অনেক কথা আছে ! ছেলে মানুষ আবদার ধরেছে, একবার ঘোড়া হই ।

(মন ঘোড়া হইল তৎপূর্থে মোহের উপবেশন ও উভয়ের প্রস্থান)

বিবেক । ছিঃ ছিঃ ছিঃ ।

গীত

মন তোমায় বুঝাই কত বলনা ।
 সবই মায়া সবই ছায়া সবই মায়ার ছলনা ॥
 ভাল ব্যাসাৎ কর্তে এলে, আপনারে ভুলে গেলে ;
 অনিত্যে প্রাণ সঁপিলে পেয়ে কাঞ্চন আর মলনা ॥
 কেবা তোমার সঙ্ঘের সাথী, মাতা, পিতা পুত্র নাভী ;
 ভাবছ কেবল স্বর্গের বাতি, সাথী কে তা দেখলে না ।
 ভাবছ জায়া অমূল্য ধন, হাসিমুখে করে যতন,
 সে যে মায়ায় সৃষ্টি, নারীর দৃষ্টি এড়িয়ে যেতে—পারলে না ।
 এখনও ভাঙ্গা হাটে হাট করে নাও,—যা কিছু পাও তুল না ॥

তৃতীয় দৃশ্য ।

মনের অন্তর মহল ।

রতি, হিংসা ও লালসা ।

লালসা । (রতির প্রতি) হ্যাঁ দিদি, তুমি রাজবাড়ীর বড় বৌ ;—সব সময় বাড়ী থাক না কেন দিদি ? মধ্যে মধ্যে আবার কোথায় যাও ?

রতি । আমার বাপের বাড়ী ।

লালসা । সে কোথা ?

রতি । ফুলের বাগানে ।

লালসা । বটঠাকুরেরও'তো সেই আশানা ।

রতি । সেইখানে তাঁতে আমাতে ছুঁতে জন্মেছি, সেইখানে ছুঁতে ম'রবো । সেই আমাদের ঘর, আহা সেখান ফুল ফোটে, মলয় বাতাস বয়, কোকিল ডাকে, ভ্রমর গুন্ গুন্ করে. আমি সেই খানে থাকতে ভালবাসি. তবে এ নেহাৎ স্বামীর বাপের বাড়ী, তাই রোজ একবার উঁকি মারি ।

লালসা । তা তুমি গহনা পরনা কেন দিদি ? ফুলের মালা আর ফুলের গহনা পরে থাক, বাসী হ'লেই ত সব ফেলা যাবে । সোণা রূপা না পর, হীরে মতি' ত প'রতে পার ।

রতি । এ স্বামীর সখ, তাঁর সখেই আমি এই সব পরি । জান ত তিনিও ফুল ভালবাসেন ।

রতির গীত .

কে বল না ফুল ভালবাসে ?
 কার তরে তবে আসে এ ফুল,
 কার তরে সে কুটে হাসে ?
 ফুল না কারো করে অনিষ্ট,
 ফুলে হয় দেবতা তুষ্ট ;
 ফুল দিয়ে লোক পূজে তার ইষ্ট,
 ফুল মধু লোভে ভ্রমর আনে ।
 নব বর বধু প্রথম মিলনে,
 পরিতুষ্ট ফুল শয্যা শয়নে ।
 ফুল যদি ফোটে নারীর জীবনে,
 ফুল হ'তে পুনঃ সুফল আসে ॥

(গার্হিতে গার্হিতে রতির প্রশ্নান)

লালসা । বেশ গায় কিন্তু—

হিংসা । আহা ! কি গানের ছিঁরি ! সরু মোটা খেলে না,
 মাগী সা, রে, গা, মাই সাধে নি কখন ! আর যেমন চেহারা, না
 আছে একখানা গহনা, না আছে একখানা ভাল শাড়ী, যে দেখে
 হিংসা কর'ব ; খালি ফুল আর ফুল, যেন ফুলের চুবড়ী, গানের
 ভণিতেও শুন্‌লিনি, খালি ঐ ফুল, আর ফুল ।

লালসা । বড় ঠাকুরও ত ঐ রকম ফুলের মটুক পরে ঘুরে
 বেড়ায় ।

হিংসা । তুই যাই কেন বল না, আমি ও জোড়াকে জোড়াই দেখতে পারি না, আমায় হিঁস্কুড়েই বল আর যাই বল । মানুষ বটে আমাদের উনি, সটান রেগেই আছেন, চক্ষু যেন করমচা, সামনে এগোয় কার সাধ্য, দুনিয়ার মধ্যে এক আমার সঙ্গেই যা বনে, নইলে দুটো খুন হ'য়ে গেল, কি চারটে জখম হ'লো, লক্ষ্যপই নেই । একেই বলে বীরপুরুষ ; নয়তো মিটমিটে প্রদীপ, মিন্মিনে ভাতার, আর অল্প জলে সাতার আমার ছ চক্ষের বিষ !

লালসা । তা আমাদের উনিও মন্দলোক নন, একটু নরম সরম বটে, কিন্তু লোকের ঠেঙ্গে আদায় করে ঢের । একটু লোভী বটে, কিন্তু যার নেয় সে সহজে পায়না টের : যদি কারুর দেখলে বরাত ভাল, অমনি সেখানে থাবা গেড়ে ব'সলো । জান ত আমি হচ্ছি লালসা, আমার নোলা কত । মাসে একমণ তেঁতুলের আচার করি, প্রাণ ধরে কাটকে কি দিতে পারি ? কারকে যদি দেখি ভাল খেতে, আমি থাকি ঠিক তার দিকে চক্ষু পেতে ;— তা সে বদ হজমেই মরুক আর যাই কোন হোক না । তা যাই বল দিদি স্বামী আমার ভাল, বলে যত পার পরের খেয়ে এস, ভালমন্দ খেতে পাবে, তাতে লোকে নিন্দে করে ক'রবে ।

হিংসা । এখন চল, রাণী পূজায় বসেছেন, তাঁর হ'য়ে কাজ ক'ররে চল । রোজ রোজ মাগীর আবার পূজা করা আছে । যেমন স্বাণ্ডী প্রবৃত্তি, তেমনি তাঁর কামনা ঠাকরুনটী ।

(মদ ও মাৎসর্যের প্রবেশ)

মদ । মা ঐ দেখ দাদামশাই ষোড়া হয়েছে, মোহ দাদা কেমন

মজা করে পিঠে চড়ে বেড়াচ্ছে ! আমি একদিন দাদামশাইকে ম্যাড়া হ'য়ে, ঐ মোহার থামে চুঃ মারতে বলুম, তা আমায় কি বললে জান ! "না, না দাদা আমি পারবো না, আমার এখনও শিং বেরোয়নি ।"

হিংসা । তা বেকবে কেন ? একচোকা মিলের ভীমরতি ধরেছে । মর মিলে, ছেলে মানুষ আবদার ক'রে ম্যাড়া হ'তে না হয় বলেইছিল, তা আর পাবুলিনি, তোর মাথাটা কি খেতলে যেতো ? এখন ঘোড়া হ'রে কাঁধে ক'রে বেড়াচ্ছি, এতে হাঁটুতে পক্ষাঘাত হ'ল না !

মাৎসর্য । (লালসার প্রতি) মা, তুমি ঠাকুরমাকে ব'লে, আমার জন্তে দাদামশাইকে একবার ঘোড়া হ'তে বল না ? আমার মানুষ ঘোড়া চড়তে বড় সাধ হ'য়েছে মা ।

লালসা । না বাচ্চা, ও বাজে ঘোড়া চড়ে কি হবে ; ভাল ভাল খাবার জিনিষ আদায় করে মায়ে পোয়ে খেয়ে বাঁচ'বো ।

হিংসা । ওলো, জানিস্নি. মোহ বড় ঠাকুরের ছেলে, বড় নাতি, তাই তার আবদার বেশী, আর এরা যেন বানের জলে ভেসে এসেছে । বুড়ো মিনুষের আক্কেল নেই ! ছি, ছি !

মহ । মা দেখবে চল না, কেমন মজা, দাদামশাই ঘোড়া হ'লে কি হবে, তাঁর তো ল্যাজ নেই, মোহদাদা কেমন একগাছা ঝাঁটা দিখে ল্যাজ বানিয়ে দিয়েছে ।

হিংসা । আমার ওসব দেখতে ভাল লাগে না বাচ্চা, বরং দুই যদি চড়তিস্ আমি খুসী হ'তুম্ ।

লালসা । চলনা দিদি, মজাটাই দেখে আসি, আর রাজাও আজ ঘোড়া হ'য়েছে, এক বালুতি ঘোড়ার দানা আজ তাঁকে দিয়ে, রাজভোগটা আমরা ভাগ করে নেব এখন ।

হিংসা । নে তুই আর জ্বালাস্ নে, তোর কেবলই নোনা ।

মদ । (হিংসার হাত ধরিয়্যা) হ'্যা যা চল ।

মাৎসর্য্য । (লালসার হাত ধরিয়্যা) তুমিও চল যা ।

(সকলের প্রস্থান ।)

চতুর্থ দৃশ্য ।

কামনাদেবীর মন্দির ।

[রাণী প্রভৃতি পূজায় উপবিষ্টা]

গীত ।

প্রবৃতি ।

চঞ্চল জীবন, চঞ্চল যৌবন,
ভুবন মগন তবু তোমারি পায় ।
মিলে নারী নরে, সুখে দুঃখে মরে,
তবু ফিরে ফিরে তোমারে চায় ॥

নিরমল চিতে, বাসনা জাগাতে,
সর্বজীব মগ্ন তব বরণায় ।
অনিত্য জেনেও নিত্য মনে করি,
তবু তব রাঙা চরণ না ছাড়ি ;
ধনে পুত্রে কত যত্ন করে মরি,
জানি সাথে কিছু যাবে না হায় ॥

[মনের পৃষ্ঠে চড়িয়া মোহের প্রবেশ ।]

মোহ । দেখ ঠাকুর মা, দেখ কেমন ঘোড়া চড়েছি ।

প্রবৃতি । একি !

মন । তোমার নাতিদের আব্দার আর কি ? কত কাঁটাবন, কত বিছুটা বন ঘুরে, কত নর্দমা, কত ডোবাখানা ডিঙ্গিয়ে আসতে হ'য়েছে, তার ঠিকানা নেই । না এলে চাবুক, দেখনা রক্ত ঝুঝিয়ে পড়ছে, পোষাক ছিঁড়ে গেছে, এখন নাতিটাকে বল, ঘোড়া আস্তাবলে নিয়ে যাক ; বাপ, কি বিপদেই পড়া গেছে ।

প্রবৃষ্টি । (মোহের প্রতি) দাওতো দাদা, এখনকার মত ওঁকে ছেড়ে, আবার ওবেলা ঘোড়া হবে এখন ।

মোহ । (মনের পৃষ্ঠ হইতে নামিয়া) দেখ ঠাকুর মা, দাদামশাই একটা খুব সুন্দর ছেলের সঙ্গে কি কথা বল্ছিল ।

(মোহের প্রশ্নান ।)

প্রবৃষ্টি । কে সে মহারাজ ?

মন । (স্বগত) এই সারুলেরে ; (প্রকাশ্যে) সে একজন সাধু, আমায় দেহতত্ত্ব, না, না, এই বল্ছিল “কিছুই কিছু না, বিশ্ব ব্রহ্মাণ্ড একটা ভৌতিক কাণ্ড মাত্র, সে তুমি বুঝবে না । আমি যাই, সর্বাঙ্গে বেদনা, মালিষ্ কর্ত্তে হবে ।

(অহঙ্কার, কাম, ক্রোধ ও লোভের প্রবেশ) ।

অহঙ্কার । মহারাজ, সেই পাগল বিবেকটা রোজ রোজ আপনার নিকট আসে শুনতে পাই ।

মন । না, না, রোজ ত' আসে না, এই আজ এসেছিল, এই মাত্র, হৃদগের জন্ত, তা আমি তাকে বিদায় করে দিয়েছি ।

কাম । মহারাজ, সে আমাদের শত্রু, আপনি যদি তার সঙ্গে ঘনিষ্ঠতা করেন, তবে আপনার রাজ্য ফিরিয়ে নিন্ ।

ক্রোধ । কে, সে ? তার সঙ্গে আমার একবার সাক্ষাৎ হ'লে, তার চক্ষু উৎপাটীত করে, তপ্ত লৌহশলাকা বিদ্ধ করে দিই, যেন আর না আসতে পারে ।

লোভ । তাকে প্রলোভন দেখিয়ে এনে বন্দী করলে হয় না ?

মন । তোমরা সব কি বলছ ? হ'য়েছে কি ? রাজা, ঐশ্বর্য্য সব তোমাদের ছেড়ে দিয়ে তোমাদের ছেলেদের নিয়ে খেলা ক'রে বেড়াচ্ছি, তাতেও তোমাদের মন পাই না । এততেও তোমাদের তৃপ্তি নাই ? কোথায় কে একজন সাধু এসেছে, কি দুটো কথা কানে শুন্লেম্ মাত্র, তাতে অম্নি শাস্ত্র অশুদ্ধ হ'য়ে গেল ! ভাল বিপদে পড়েছি যা হোক ।

শ্রবৃষ্টি । বিপদ তো হবেই মহারাজ, আজ ক'দিন থেকে আপনাকে যেন বিরক্ত দেখছি ; এর কারণ কি মহারাজ ? কেন বিরক্ত, কিসের জন্ত ? বলেন না, ছেলেদের রাজা, ঐশ্বর্য্য দিয়েছেন, কে আপনাকে দিতে ব'লেছিল ? আপনি নিজেই না দিয়েছেন । ক'দিন তাই আপনাকে আমার সঙ্গেও ভাল করে কথা কইতে দেখিনি, মহারাজ, নাতিরাত্ত যদি একটুকু আব্দার নেয় তাতেও আপনি মহাবিরক্ত, কেন ? শুনেছি স্বপত্নী—পুত্র বিবেক ব'লে কে একজন আছে, তাকে নিয়ে আপনি উন্মত্ত । না ? তা হ'ন্, তাতে আমাদের কোন ক্ষতি হবে না । তার যা নিবৃষ্টিকে এনে পাট'রাণী করুন, তাতেও আমার কোন দুঃখ নেই, আমি ছেলেদের নিয়ে সুখে বনে গমন ক'রবো । কিন্তু মহারাজ, এই পুত্রদের নাম্‌নে বলছি, এই ইষ্টদেবী কামনাদেবীর সাক্ষাতে বলছি, আমি

যদি সতী হই, এর ফল পাবেনই পাবেন। আপনার রাজ্য ঐশ্বর্য কিছুই থাকবে না, নিবৃত্তিকে রাজপুরীতে আনলে আপনার বংশলোপ হবে, বংশে বাতি দিতে কেউ থাকবে না, আর বংশগণ—

(কাম, ক্রোধ ও লোভকে লইয়া প্রবৃত্তির প্রস্থান ।)

মন। সেনাপতি, ওদের ডাকো, না, না থাক আর ডেকে কাজ নেই। না ডাকো, আচ্ছা! আজ থাক, বড় রাগ হ'য়েছে, আজ থাক। দেখ, আমি তাকে কোন দিনই ডাকিনি, সে আপনিই আসে, দেখা হ'য়ে যায়, তাই দুটো কথা হয়, তাতেই এত রাগ? কেন, তাতে হ'য়েছে কি? মরুক গে, রাগ করেন তো ভারী ব'য়েই গেল। আচ্ছা, ভূমি এখন যাও সেনাপতি, আমি একটু একলা থাকতে চাই।

(অহঙ্কারের প্রস্থান ।)

মন। নাতি তিনটে আমায় বড়ই জ্বালাতন করে, কেউ ঘোড়া হ'তে বলে, কেউ ম্যাড়া হ'তে বলে, কেউ কাঁধে চড়ে, কেউ মাথা ভাঙতে বলে; প্রাণ ওষ্ঠাগত; তবু বেটাবেটীদের মন পাই না। এরাই সব আমার আপনার জন! হা অদৃষ্ট! আপনার জন কি চায়? কেবল অর্থ, কেবল স্বার্থ; তাতে আমি ওদের সব দিয়েছি, ওরা ভোগ করুক না! আমার নিয়ে টানাটানি কেন? যত দিন যাচ্ছে, তত কোথায় শান্তি পাবো, না ততই অশান্তি, ততই গোলমাল।

[গাইতে গাইতে স্মৃতির প্রবেশ]

স্মৃতি । “কেন ব্রাহ্ম পথে পড়ে, চল সত্য পথ ধ’রে” ইত্যাদি ।
মন । বাঃ, বাঃ কে গায় ? কি গুনি ?—এই যে এই দিকেই
আসছে ।

[স্থির হইয়া মনোযোগ সহকারে স্মৃতির
গান শুনিতে লাগিলেন ।]

স্মৃতির গীত ।

কেন ব্রাহ্ম পথে পড়ে, চল সত্য পথ ধ’রে ।
দেখে তো শেখ না, ঠেকেছ দেখ না,
ভাবনা নিজ অন্তরে ॥

সেথা বিবেক মাধিছে, বাশরী বাজিছে
হৃদয় যমুনা তীরে ;
হেথা কি ল’য়ে ভুলিয়ে, মোহেতে মজিয়ে,
ডুবিতেছ দুঃখ নীরে ॥

ঐ যে উষা হৃদয় গগনে, চেয়ে দেখ দেখি,
আজি তার পানে ;

(দেখ) শাস্ত ছবি, নিজ আত্মরবি,
উদিতোছে ধীরে ধীরে ॥

মন । কে যা ভুমি ?

স্মৃতি । মহারাজ, দাসীর প্রণাম গ্রহণ করুন । আমি

সুমতি । আজ আপনি কুমতির ও প্রবৃত্তির কাদে পড়ে, অশান্তির সাগরে হাবুডুবু খাচ্ছেন । তাই আমি আপনাকে সে ঘূর্ণিপাক থেকে উদ্ধারের উপায় ব'লে দিতে এসেছি । পথহারা পথিক । আজ আমি সত্যপথের সন্ধান বলে দিতে এসেছি ।

মন । তাই চল, তাই চল । সুমতি আজ আমি সত্য সত্যই প্রবৃত্তির তাড়নায় অস্থির হ'য়ে পড়েছি । কাম, ক্রোধ, লোভ, মোহ, মদ, মাৎস্য চারিদিক থেকে ঘিরে আমায় দিশেহারা করে ফেলেছে । জীবন আমার দুঃসহ বোধ হচ্ছে । সুমতি, পার যদি, আমায় শান্তির পথ ব'লে দাও ।

সুমতি । মহারাজ, আপনার উপযুক্ত পুত্র বিবেক আর সাধ্বী পত্নী নিবৃত্তি আপনার আশাপথ চেয়ে ব'সে আছে । তাদের কাছে চলুন, আপনার সকল ক্রোধ দূরে যাবে—আপনি শান্তি পাবেন ।

মন । ষা থাকে কপালে, চল তোমার সঙ্গে যাই ; বিবেককে কথা দিয়েছি, দেখা কর্তেই হবে । কেন ক'রবো না ? সে ভাল কথা বলে, সে ভাল পরামর্শ দেয়, চল যা, আমরা এই বেলা যাই, নইলে কেউ এসে পড়লে আর যাওয়া হবে না । সেদিন বিবেককে বললুম, “চল, তোমার মার সঙ্গে দেখা করে আসি,” আর সেই সময় মোহ এল, আর যাওয়া হ'ল না । আজ নিশ্চয় যাব । সুমতি, তুমি আমায় পথ দেখিয়ে নিয়ে চল ।

[সুমতি মনের হাত ধরিয়—“কেন ভ্রান্ত পথে পড়ে”

গীত গাহিতে গাহিতে চলিয়া গেল ।]

(মদন ও রতির প্রবেশ ।)

মদন ও রতির গীত ।

চ'লে চল কাজ ফুরাল নাই কিছু আর বাকি ।
 শুনেছে দূর বংশীধ্বনি আর কি মোরা থাকি ॥
 বাজে বাঁশী আয় আয় আয়, আর কি সে থাকতে চায় ।
 সব ছেড়ে ঐ ছুটে যায়, বংশীধরে ডাকি ॥
 ছুটে গেল মায়ার টান, বুখা হ'ল ফুলবান,
 মিছে ঘুরি ধনু ধরি আর কেন হাতে রাখি ॥

[ফুলবান ও ধনু নিক্ষেপ ।]

ইতি দ্বিতীয় অঙ্ক সমাপ্ত ।

শ্রীগৌর হরি বসাক

তৃতীয় অঙ্ক ।

প্রথম দৃশ্য ।

নিবৃত্তির কুটীর সম্মুখ ।

গীত ।

সুমতি সঙ্গিনীগণ ।

আমরা সুমতিসঙ্গিনী ।

সুমাতর শ্রোতে কুমতি ভাসিবে, মোরাতো তারি তরঙ্গিনী ॥
আপাত মধুর কুমতি চলনা, কারে কবে সুখী করেছে বলনা ।
হৃদি মাঝে তার আছে কাল ফণা, দংশে জরজর করে ভুজঙ্গিনী ;
সুমতি এসেছে ভাবনা কি আর, কুমাতরে আজ কর পরিহার,—
হৃদয়ে পাইবে আনন্দ অপার, নিজ বিধে নিজে মরিবে নাগিনী ।

(সুমতি সঙ্গিনীগণের গাহিতে গাহিতে প্রস্থান ও

অপর দিক হইতে নিবৃত্তি, মন, বিবেক

ও সুমতির প্রবেশ ।)

নিবৃত্তি । স্বামীন্, প্রভু, জীবিতেশ্বর, আমার হৃদয় সর্ব্বদা,
এতদিন দাসীকে আপনি ভুলেছিলেন, কিন্তু দাসী একলহমাও
আপনাকে ভুলতে পারে 'ন ।

মন । তাইতো, তাইতো ! এখন আমার সব মনে পড়েছে । পূর্বে জন্মেও আমার এইরূপই মতিলম হয়েছিল, এইরূপেই আমি অনুতাপ করেছিলুম, তবু বাসনার হাত এড়াতে পারিনি, তাই আবার দুঃখের আগার, পুতীগন্ধময় মনুষ্যাগর্ভে জন্মেছি । প্রিয়ে, আমায় ক্ষমা কর, বিবেক তুমিও আমায় ক্ষমা কর, এতদিন আপনার জনকে চিনতে পারিনি । এতদিন ভূতপেত্নীতে আমায় আশ্রয় করেছিল, আমায় তারা কুরে কুরে খাচ্ছিল, আমি পালিয়ে এসেছি, আর যাবনা, এখন আপনার লোক পেয়েছি, আর যাব না । প্রিয়ে, আর তোমায় ত্যাগ ক'রে কোথাও যাব না, আর আমায় ত্যাগ ক'র না । চল ! তোমার কুটীরে যাই, ঐ কুটীর আমার রাজ্য হবে, তুমিই আমার রাণী হবে, বিবেক আমার পুত্র হবে, আর কেউ না, আর কেউ এ হৃদয়ে স্থান পাবে না । প্রিয়ে, চল ; আমি তোমায় দুঃখ দিয়েছি, আমি তার প্রায়শ্চিত্ত ক'রবো ।

বিবেক । মা ! পিতাকে আপনার আশ্রমে নিয়ে যান । আমি গুরুদেবের সঙ্কানে হিমালয় প্রদেশে গমন করি ; তিনি এলেই আমাদের সকল সাধ মিটবে, সকল আশার তৃপ্তি হবে, সকল কার্য ফুরাবে । স্মৃতি, রাজার কাছ ছাড়া হ'য়ো না, রাজার সেবার ভার তোমার উপর দিলাম । পিতা, জননী, দাসকে বিদায় দিন ।

মন । বিদায় ব'ল না বৎস, তুমি আমার অন্ধের বাঁধি, তুমি না পথ দেখালে আমি এতদূর আসতে পারতুম না । শীঘ্র গুরুদেব

জ্ঞানানন্দকে নিয়ে এখানে ফিরে এস, বেশী দিন আমায় তুমি ছেড়ে থাকো না ।

(উভয়কে প্রণাম করিয়া বিবেকের প্রস্থান)

নিবৃত্তি । মহারাজ, আমার ভয় হচ্ছে, পাছে আপনি আবার প্রবৃত্তির প্রলোভনে মুগ্ধ হ'ন ।

মন । প্রিয়ে, সে ভয় আর নেই, আর আমি তোমায় ত্যাগ করে কোথাও যাব না ।

সুমতি । না—মা, আর ভয় নেই, বিশেষ আমি যখন মহারাজের সঙ্গে আছি ।

(দুঃখের প্রবেশ ।)

মন । কিহে সংবাদ 'ক ?

দুঃখ । আপনি এখানে এসেছেন, আর নারিক সেখানে যাবেন না, তাই শুনে রাণী প্রবৃত্তি উদ্ভবনে প্রাণত্যাগ করেছেন ।

মন । এঁ্যা ! (বিষণ্ণভাবে কিছুক্ষণ ভাবিয়া) যাক , ভালই হ'ল ।

দুঃখ । রাজবাড়ীতে ভারি হলুহল পড়ে গেছে, সেনাপতি মহাশয় ও রাজকুমারেরা আপনাকে নিয়ে যেতে আমায় পাঠিয়েছেন ।

মন । কেন ? আমায় আবার তাদের কি দরকার ? আমায় নিয়ে ফের টানাটানি কেন ?

দুঃখ । তা জানি না—তবে রাজকুমারেরা আমায় ব'লে

দিলেন, যে মহারাষ্ট্রকে নিয়ে আমি যেন এখনই রাজপুরীতে হাজির
হই ।

মন । কি । আমি কি তাদের তাঁবেদার,—যে হুকুম কলেই
হাজির হব ?

দুঃখ । তা আমি কি ছানি,—এখন আমার প্রতি কি আজ্ঞা
হয় ?

মন । তুমি তাদের ব'লগে, আর আমি তাদের নিকট যাব
না । তারা যা পারে করুক, তাদের সঙ্গে আর আমার কোন
সম্পর্ক নেই । চল প্রিয়ে, তোমার কুটীরে যাই, আজ আমি
নিশ্চিন্ত । প্রবৃষ্টি ম'রেছে, বানাই গেছে, যত দুর্দশার ঝলই ছিল
সে, সে ষগ্ন ম'রেছে তখন আর আমার ভয় কি ? দুঃখ, তুমি
যাও, যা বলে দিলুম তাদের ব'লগে, হাঁ । কেবল মাত্র বৃদ্ধ মন্ত্রীকে
অবসর যত আমার সহিত সাক্ষাৎ কর্তে ব'ল । তাড়াতাড়ি নয়,
যে দিন হয়, ষগ্ন হয় ।

(আভিমান প্রায়ঃ দুঃখের প্রস্থান)

মন । চল রাণী ।

(নিবৃতি এক মনে উর্দ্ধদৃষ্টে সমাধিস্থ ভাবে শূন্যপানে কি
দেখিতেছিলেন ; রাজা তাঁহাকে অচল অবস্থায়
দেখিয়া তাঁহার মুখের দিকে সবিস্ময়ে চাহিলেন

ও বৃদ্ধ থাকি দিয়া)

মন । রাণী, রাণী !

নিবৃত্তি । (কতক প্রকৃতিস্থ হইয়া অর্দ্ধ-তজ্রাচ্ছন্নমূরে)
 মহারাজ—আমি কি দেখছি জানেন ? আপনার আর আমার
 মিলনের ফলে, ভগবানের করুণা যুক্তি পরিগ্রহ করে বৈরাগ্যরূপে
 আমার মধ্যে সঞ্চারিত হ'চ্ছে ! একি অপূর্ব জ্যোতিঃ ! একি
 অনিন্দিত চন্দ্র পুঙ্ক আমার আচ্ছন্ন করে ফেলছে, মহারাজ ?

(নিবৃত্তি যেন তজ্রাচ্ছন্ন হইয়া পড়িয়া যাইতেছিল মন
 তাহাকে ধরিয়া ফেলিল)

মন । রাণী, সত্যই তুমি ভাগ্যবর্তী । ভগবানের অনন্ত
 করুণার ফলেই আজ আমি তোমার মত ভক্তিমতী স্ত্রীকে চিন্তে
 পেরেছি । চল তোমাকে কুর্টীরের মধ্যে নিয়ে যাও ।

[নিবৃত্তিকে ধরিয়া লইয়া মনের প্রশ্নান]

(গাহিতে গাহিতে ভক্তির প্রবেশ ।)

গীত ।

ভক্তি ।

আমি তারে খুঁজি যে খোঁজে আমায় ।

আগে খোঁজে কিনা বুঝিতে পারে না শেষে এসে তাই গড়ায় পায় ॥

সুমতি । (বাধা দিয়া) এই যে, ভক্তি দিদি, তুমি এসেছ,
 ভালই হ'য়েছে, আমি তোমার কথাই ভাবছিলুম । রাজাকে
 এনে পৌছে দিলুম । এইবার তুমি দিদি রাজার সঙ্গে সঙ্গে থেকে

রাজাকে পথ দেখিয়ে নিরে চল। আহা! প্রবৃত্তির তাড়নায়
অস্থির হ’য়ে শান্তির জন্মে ব্যাকুল হ’য়ে রাজা ছুটে এসেছে। তুমি
না পথ দেখিয়ে দিলে’ত দিদি, রাজা শান্তির সন্ধান পাবে না।

(ভক্তি আবার গান ধরিল।)

“আমি তারে খুঁজি”—

সুমতি । (বাধা দিয়া) আগে আমার কথার উত্তর দাও
দিদি।

ভক্তি । আহা! গানটা আগে শোনই না।

গীত।

আমি তারে খুঁজি যে খোঁজে আমায়।

আগে খোঁজে কিনা বুঝিতে পারে না শেষে এসে তাই গড়ায় পায় ॥

সংসার জালায় যে জুড়াতে চায়, সেই খুঁজে খুঁজে আমারে পায় ;

অবাধে না তারে ভব পারাবারে অকুল পাথারে সে কুল পায় ॥

কামনা বর্জিত নিরমল চিতে প্রেমানন্দ আমি তারে পারি দিতে ;

বিশ্বপ্রেম মিশে ভক্তিতে প্রেমেতে চির শান্তি পথে মিশিয়া যায় ॥

ভক্তি । গুনলি বোন ? আমি তো সব সময়েই শান্তির সন্ধান
বলে দেবার জন্ম, রাজাকে খুঁজে খুঁজে বেড়াচ্ছি। কিন্তু রাজা
ষতদিন না আমাকে চাইছে, ততদিন তো আমি তার কাছে যেতে
পারি না। এখনও সে সময় হয়নি ; বুঝলি বোন ? এই সবে
নিবৃত্তিদেবীর সঙ্গে মিলনে, রাজার মহাতেজোশালী পুত্র, বৈরাগ্যের
জন্মের সূচনা হ’য়েছে। বৈরাগ্য জন্মালে তবে রাজা আমায়

খুঁজবে ;—তখনই আমি রাজার কাছে ধাব বোন ! আগে থাকতে এত ব্যাকুল হ'লে চ'লবে কেন, বল ?

সুমতি । তুমি ঠিক বলেছ দিদি । কিন্তু দেখো, ঠিক সময়ে রাজাকে দেখা দিতে যেন ভুলো না । আহা ! দিদি, রাজা বড় হুঃখী ।

ভক্তি । না রে না পাগলি, আমার জন্তে তোর কিছু ভাবতে হবে না । এখন চল, রাজা আবার নজরের বার হ'য়ে না যায় ।

সুমতি ও ভক্তির দ্বৈত গীত ।

সুমতি ।	তব কৃপা হ'লে তবে শাস্তি পাবে :
ভক্তি ।	সময় আসিলে ঠিক মোরে চা'বে ।
সুমতি ।	তুমি না দেখালে সেত দেখিবে না ;
ভক্তি ।	তাহারি তরেত মম আনাগোনা ।
সুমতি ।	মোহে মজে ছিল নিজেরে জানেনা ;
ভক্তি ।	তব কৃপা পেল কি আর ভাবনা,
সুমতি ।	তোমারে পাইলে প্রেমে হবে জয়ী
ভক্তি ।	সে'ত তব কৃপায় গুন কৃপাময়ি ।
সুমতি ।	রেখ রেখ তাঁরে রাঙ্গা পায় ওই ;
ভক্তি ।	এলে পরে তাঁরে কোলে তুলে লই ।

(উভয়ের প্রস্থান)



দ্বিতীয় দৃশ্য ।

মন্ত্রনাগার ।

অহঙ্কার, বুদ্ধি, কাম, ক্রোধ ও মোহ ।

অহঙ্কার । রাজা যখন আমাদের ত্যাগ ক'রেছেন, তখন আর আসবেন না । তিনি যেখায় থাকুন আমার ছেড়ে কোনদিন থাকেন নি । নিশ্চয় বিবেক তাঁকে আটক ক'রেছে । আমার মতে ত্তো বিবেককে বধ ক'রে রাজাকে উদ্ধার করা আবশ্যিক । তা হ'লেই তার সহিত যুদ্ধ হ'বে । আর সে যুদ্ধে আমাদের নিশ্চয় জয় হবে । তবে পরিতাপ, এই যে শেষে রাজার বিরুদ্ধে যুদ্ধ কর্তে হ'ল ।

কাম । কিসের পরিতাপ ? যখন তিনি, আমাদের জননী প্রবৃষ্টি দেবীর মৃত্যুর সংবাদ শুনেও একবার এলেন না, বরং দুঃখের মুখে ব'লে পাঠালেন, যে আমাদের সহিত তাঁর কোন সম্পর্কই নাই, তখন তাঁর জন্ম আবার পরিতাপ ? এখন চলুন, বিবেককে বধ ক'রে রাজাকে বন্দী করে নিয়ে আসি । পাপাত্মা বিবেকের কত বল, কত কৌশল, এইবার তার পরীক্ষা হ'বে ।

ক্রোধ । এতো বাকবিতণ্ডায় সময় নষ্ট ক'রবার প্রয়োজন কি ? এখন চল, তার মুগ্ধপাত করে ফেলিগে, রাগে আমার সর্ব শরীর কণ্টকিত হ'য়ে উঠছে । বিবেককে দেখতে পেলে তাকে খণ্ড খণ্ড ক'রে কুকুর দিয়ে ভোজন করালেও, আমার এ জালা মিটবে না ।

মোহ । আমার মতে মন্ত্রী মহাশয়কে একবার রাজার কাছে

পাঠান হোক, উনি ভিক্ষে ভিক্ষে বা যেমন ক'রে পারেন, একবার বুঝিয়ে দেখুন। তাতে যদি না পারেন, যুদ্ধই শ্রেয়ঃ। কি বলেন মন্ত্রী মশায় ?

বুদ্ধি। দেখুন রাজকুমারগণ; আপনারা রাজাকে বন্দী ক'রে আনা যত সহজ ভাবছেন;—আমার ধারণা তত সহজে কাজ হাসিল হবে না। দুঃখের নিকট রাজার সংবাদ শোনার পর, আমি গোপনে রাজার অবস্থার সংবাদ, আরও ভাল ক'রে জানুবার জন্যে সংশয়কে গুপ্তচর ক'রে রাজার কাছে পাঠিয়েছিলুম। তার কাছে আমি সংবাদ পেয়েছি যে, বিবেক ছোকরা চক্রান্ত ক'রে রাজাকে আমাদের কাছ থেকে নিয়ে গেলেও, এখন সে ছোকরা সেখানে নেই। সে নাকি হিমালয় প্রদেশে তাদের মহাতেজঃ গুরুদেব জ্ঞানানন্দকে রাজার রক্ষার্থে আনুবার জন্তু গিয়েছে। আমাদের অবশুই বিবেক আর জ্ঞানদেব ফিরে আসবার পূর্বে রাজাকে অধিকার ক'রে ফেলতে হ'বে।

লোভ। নিশ্চয়ই—নিশ্চয়ই,—মন্ত্রীর কথা অতি যুক্তিযুক্ত।

অহঙ্কার। তারই বা দরকার কি ? আমি জ্ঞানদেব, ক্যান্দেব কাউকেই গ্রাহ্য করি না।

বুদ্ধি। অতটা স্পর্ধা ভাল নয়, সেনাপতি। কিসে কি হয় বলা শক্ত।

লোভ। জ্ঞান এসে পৌঁছাবার পূর্বে গেলে তো খুব সহজেই কাজ হাসিল হ'তে পারে, মন্ত্রীবর।

বুদ্ধি। কুমার, সংশয়ের মুখে সংবাদ যা শুনলেম, তাতে সেও

যে বড় সহজে হবে তা মনে হয় না। রাণী নিবৃত্তি নাকি বৈরাগ্য নামে একটি পুত্র প্রসব করেই মারা গিয়েছেন।

ক্রোধ। নিবৃত্তিকে রাণী বলে, রাণী কথাটার অর্থ্যাদা ক'রবেন না মন্ত্রী মহাশয় ;—সে তো মায়াবিনী।

বুদ্ধি। রাজকুমার একটু ধৈর্য্য ধারণ ক'রে আগে কথাটা একবার শুনুন।

কাম। বলুন—বলুন মন্ত্রী ! নিবৃত্তি তা হ'লে সত্যসত্যই মরেছে ?—আঃ বাঁচা গেল।

বুদ্ধি। আজ্ঞে যুবরাজ ! বিশেষ নয় ! নিবৃত্তিদেবী ম'রেছেন বটে ;—কিন্তু বৈরাগ্য জন্মাবার পর থেকে রাজার অন্তরের সমস্ত স্নেহরাশি সেই মাতৃহারা বালক বৈরাগ্যের উপর কেন্দ্রীভূত হ'য়েছে। রাজা বৈরাগ্যকে নিয়ে এতই উন্মত্ত হ'য়ে পড়েছেন, যে তার জন্তে তিনি রাজ্য, ঐশ্বর্য্য, এমন কি আপনাদের পর্য্যন্ত ত্যাগ ক'রতে, বিন্দুমাত্র কাতর বলে বোধ হয় না। কুমার, সংশয়ের মুখে এই সকল কথা শুনে, আমার মনে সত্যই সংশয় জাগছে ; - আপনারা রাজাকে বৈরাগ্যের কবল থেকে মুক্ত ক'রে এখানে পুনরায় আনতে পারবেন কি ?

ক্রোধ। মন্ত্রীবর, বৈরাগ্য ত বালক ;—বিবেকের বদলে তাকেই বধ ক'রে, আমরা রাজাকে উদ্ধার ক'রে আনবো। আমাদের এ যুদ্ধযাত্রা কিছুতেই বন্ধ হ'তে পারে না।

কাম। তাই কর্তব্য বলেই মনে হচ্ছে। মন্ত্রী মহাশয়, আপনি একবার তার পূর্বে রাজার কাছে গিয়ে, তাঁকে ফিরে আসবার জন্তে

বুঝিয়ে বলুন ; যদি তিনি অবিলম্বে না ফেরেন, তবে আমরাও তৎক্ষণাত্ তাঁকে আক্রমণ কর্তে বাধ্য হব ।

অহঙ্কার । রাজকুমার !—আমি এখনই সৈন্যদের সজ্জিত কর্তে যাচ্ছি ।

কাম । চলুন সেনাপতি, আমরাও আপনার সঙ্গে যাচ্ছি । মন্ত্রীমহাশয়, আপনি তাহ'লে শীঘ্র সাজগোজ ক'রে যাত্রা করুন ।

(বুদ্ধি ব্যতীত সকলের প্রস্থান)

বুদ্ধি । এঁদের তো দেখছি ঘর ভাঙলো ;—রাণী প্রবৃত্তি মরবার পরই রাজ্যের সমস্ত শ্রীই যেন নষ্ট হ'য়ে গেছে—রাজপুত্রদের ও যেন আর পূর্বেকার প্রভাপ নাই—কামকে তো বিশেষ ক'রে রতি দেবী মরবার পর থেকেই, যেন প্রাণহীন খোলস ব'লে মনে হয় । যুদ্ধে যে কোন পক্ষ জিতবে তা বলা যায় না । সংশয়ের মুখে যা শুনলুম, তাতে বৈরাগ্যের কাছ থেকে রাজাকে ছিনিয়ে আনা, বড় সহজ হবে না : এখন আমি কি করি ? থাক—এখন রাজার কাছে তো যাই ; তারপর যে পক্ষ সুবিধাজনক বুঝবো—সেই পক্ষেই ভিড়ে পড়া যাবে ।

(বুদ্ধির প্রস্থান)

(শীর্ণা কুমতিকে লইয়া কামের পুনঃপ্রবেশ)

কাম । না—না—কুমতি, তুমি এরকম নিরুৎসাহ হ'লে চলবে না । মদির হয়ে ওঠ, হাওয়ায় হাওয়ায় মাতন ছড়িয়ে আর একবার বিশ্বসংসারকে ক্ষিপ্ত করে টলিয়ে দাও । রাজাকে আবার ফাঁদে

কেলে রাজ্যে ফিরিয়ে আনা চাইই । রাজা এলেই শ্রীহীন রাজ্য
আবার সব দিক দিয়ে জঁাকিয়ে উঠবে । এ দৈত্বে বশ পরিত্যাগ
ক'রে, তুমি আবার তোমার সেই পূর্বের মত মনোমোহন সাজে
সাঝো, —অস্তরে বাহিরে—ভুবনমোহিনী নবযৌবনশ্রী ফুটিয়ে তোলো
—লাশ্ময়ী লীলাচঞ্চলা মূর্তিতে সর্কালে বাসনার হিল্লোল তুলে আর
একবার বিশ্বসংসারকে তাক লাগিয়ে দাও, তোমার কুহেলী সৃষ্টির
জাগ্রত চোখ ঢেকে দিক ।

কুমতি । যুবরাজ, পূর্বেই তো বলেছি, রাণী প্রবৃত্তির উদ্-
বন্ধনে দেহত্যাগের পর আমারও দুর্দশার চরম হ'য়েছে . উপযুক্ত
রাজভোগের অভাবে আমি আজ শীর্ণা, শ্রীহীনা- তিলে তিলে মরণ
পথের যাত্রী ! যুবরাজ, যাকে দেখছেন সে কুমতি নয় কুমতির
কঙ্কালমাত্র ;—আর কি আমি রাজাকে মুগ্ধ কর্তে পারবো—

কাম । নিশ্চয় পারবে, নিশ্চয় পারবে—আমি তোমার সহায়
হব । আমার সহায়ে এ ধরণীতে কোন কার্য তোমার অসাধ্য,
কুমতি ? মনে করে দেখ. কত শত যোগমগ্ন মুনিঋষি মুহুর্তে মাত্র
আমার প্রভাবে পদস্থমিত হ'য়েছে । চল, প্রকৃতির সমস্ত সৌন্দর্য্য দেহে
ফুটিয়ে তুলে, বিশ্ববিমোহন সাজে আমার সঙ্গিনী হও । ক্রোধ, লোভ
প্রভৃতি বোধ হয় এতক্ষণে প্রস্তুত,—আর তো বিলম্ব কলে
চলবে না !

(কুমতিকে লইয়া কামের প্রস্থান)

তৃতীয় দৃশ্য ।

নিবৃতি দেবীর আশ্রম সন্নিকটস্থ উপবন ।

বৈরাগ্য ও মন ।

বৈরাগ্যের গীত ।

সংসার সাগরে জ্ঞানই তরণী
 বিনা জ্ঞান, অজ্ঞান, হীন পশু হেন,
 ভ্রমিতেছ কেন আসিয়ে' ধরণী ॥
 কে তুমি কিসের আশা, কেন এ ধরায় আসা,
 দেখ কোথা পিপাসা বুঝিয়ে আপনি ॥
 কি ভাল কিবা মন্দ, কেন আর বৃথা হন্দ,
 দেখ কোথা আনন্দ পাইবে এখনি ॥

মন । বৈরাগ্য, বাপ্ আমার বুকে আয় ! এইটুকু বয়সে
 এত কথা তুই শিখলি কি ক'রে ?

বৈরাগ্য । নিবৃতি ষার জননী, ভগবৎ-চরণ-প্রয়াসী মন ষার
 জনক, তার মুখে এ ছাড়া আর কোন্ কথা শোভা পায় পিতা ?

মন । আমার কি মনে হয় জানিস্ বৎস ? কত পুণ্যফলে,
 মানুষ তোর মত পুত্র পায় ! ওরে আমার বার্কিক্যের সঞ্চল, নয়নের

মণি ষাটুকর, তোর মুখে ভগবৎ করুণার এ কি প্রশান্ত প্রতিচ্ছবি
দেখ তে পাই !

(বুদ্ধির প্রবেশ ।)

মন । এই যে মন্ত্রী, কি সংবাদ ?

বুদ্ধি । মহারাজ ! রাজকুমারেরা আপনাকে রাজ্যে ফিরিয়ে
নিয়ে যাবার জন্য ফের আমায় আপনার কাছে পাঠালেন ।

মন । আমি যে রাজ্য ঐশ্বর্য ছেড়ে দিয়ে এসেছি মন্ত্রী ;—এখন
আবার কোথায় যাব ?

বুদ্ধি । মহারাজ, রাজকুমারেরা আপনার বিরুদ্ধে যুদ্ধের
আয়োজন ক'রেছেন ;—আপনি স্ব-ইচ্ছায় না গেলে, তারা আপনাকে
জোর করে রাজ্যে ফিরিয়ে নিয়ে যাবে ।

মন । মন্ত্রী, আমি বৃদ্ধ হ'লেও এখনও একেবারে অশক্ত হইনি ।
জোর করে যদি তারা আমাকে নিয়ে যেতে পারে তো নিয়ে যাক্ ।

বুদ্ধি । রাজকুমারেরা ব'লে দিয়েছেন যে, আমার ফিবুতে বিলম্ব
হ'লে, তারা আমার ফেরবার অপেক্ষা না ক'রেই, সদলে এখানে
চ'লে আসবেন ।

মন । এ যুদ্ধে তুমি কোন্ পক্ষ অবলম্বন ক'রবে মন্ত্রী ?

বুদ্ধি । মহারাজ, আমি চিরদিনই আপনার অনুগত । মহারাজ
আমি স্থির করেছি, আর আমি রাজকুমারদের কাছে ফিবু না ।

মন । সে তোমার ইচ্ছা—কিন্তু আর আমার কাউকেই

প্রয়োজন নেই। আচ্ছা মন্ত্রি, তুমি এখন তাহলে কুটীরে যাও,
আমি একটু পরে যাচ্ছি।

বুদ্ধির প্রশ্নান।

মন। বৈরাগ্য, বাপ, শুনলি? শেষে আমারই হতভাগ্য
কুপুলেরা আমার বিরুদ্ধে যুদ্ধ কর্তে আসছে!

বৈরাগ্য। ভাবনা কি পিতা? আমি বৈরাগ্য আপনার সঙ্গে
থাকতে—ভগবৎপদে আপনার মতি থাকতে, আপনার আবার
কিসের চিন্তা?

[সহসা প্রকৃতিতে নব সৌন্দর্যের আবির্ভাব হইতে লাগিল।
রাজার একটু পরে সেই দিকে দৃষ্টি পড়ায়—]

মন। একি! প্রকৃতিতে এ সৌন্দর্য কোথা থেকে এল?
বাঃ, বাঃ, এখানে যে এত সৌন্দর্য লুকান ছিল, তাতো এতদিন
চোখে পড়েনি।

[মন উৎফুল্ল হইয়া ইতস্ততঃ নিরীক্ষণ করিতে লাগিল, — দূরাগত
একটা মধুর সুরে আকৃষ্ট হইয়া সেই দিকে দৃষ্টি করিয়া রাজা দেখিল,
অপূর্ব সুন্দরী মনমোহিনী সজ্জায় কে এক রমণী নৃত্য করিতে করিতে
রাজার দিকে অগ্রসর হইতেছে। রাজা মুগ্ধ হইয়া নৃত্য দেখিতে
দেখিতে আকৃষ্ট হইয়া ক্রমে ক্রমে রমণীর দিকে অগ্রসর হইতে
লাগিল। সঙ্গে সঙ্গে রাজার মুখে কামের ভাব ফুটিয়া উঠিতেছিল,
ও তিনি বৈরাগ্য হইতে ক্রমে ক্রমে দূরে সরিয়া যাইতেছিলেন।
অদূরে একপার্শ্বে রাজার অনক্ষ্য থাকিয়া কাম রাজাকে নিরীক্ষণ

করিতেছিল। রাজার ভাবান্তর দেখিয়া কাম উৎফুল্ল হইয়া উঠিতেছিল। বৈরাগ্য এতক্ষণ স্থিরভাবে দাঁড়াইয়া সমস্ত ব্যাপার লক্ষ্য করিতেছিল—হঠাৎ সে গান ধরিল।]

গীত।

বৈরাগ্য। কাম জ্বলে প'ড়ে কোথা যাও স'রে,
ফিরে এস নরবর—সুন্দরু কোলে।
কামেতে সৌন্দর্য কোথা ?
কামে মাথা আঁবিলতা।

পরম সুন্দর যার, সাথে রহে অনিবার,
তার কেন এ বিকার,—বাসনা গরলে ?

[বৈরাগ্যের গান আরম্ভ হইতেই রাজা থমকিয়া দাঁড়াইল,—
রমণীর নৃত্যে বাধা পড়িল,—কামের উৎফুল্ল মুখে একটু একটু করিয়া
উদ্বেগের ছায়া ফুটিয়া উঠিতে লাগিল। বৈরাগ্যের গান যতই
অগ্রসর হইতে লাগিল, রাজা ততই ধীরে ধীরে বৈরাগ্যের দিকে
ফিরিয়া আসিয়া অবশেষে বৈরাগ্যকে জড়াইয়া ধরিল। ইতিমধ্যে
রাজার মুখ হইতে কামভাব ক্রমে ক্রমে অন্তর্হিত হইয়া বৈরাগ্যের
ভাব ফুটিয়া উঠিয়াছে এবং তাহার চোক দিয়া টস্ টস্ করিয়া জল
পড়িতেছিল। এই অবস্থায় বৈরাগ্য কামের দিকে চাহিলে কাম
জলিয়া ভস্ম হইয়া গেল ও নর্তকী রমণী (কুমতি) কোঁকড়াইয়া
মরিয়া গেল।]

বৈরাগ্য । ঐ দেখ পিতা—

মাগ্নামোহে পুনঃ আচ্ছন্ন করিতে তোমা’

এসেছিল কাম—কুমতিরে ল’য়ে সাথে ।

বার্থ হের প্রয়াস তাদের—

ভস্মীভূত কাম,

প্রাণত্যাগ করেছে কুমতি ।

মন । এঁ! কাম ভস্মীভূত ! আর একি, কুমতি ?

[নিকটে গিয়া দেখিল ।]

বৈরাগ্য । ছঃখ কি পিতা ! ওরা আপনাকে আবার আমার
কামের ফাঁদে ফেলতে এসেছিল ।

মন । না, ছঃখ নয় । বৈরাগ্য, বাপ্ তুইই আমার আবার
অধঃপতনের হাত থেকে রক্ষা করি ।

(সক্রোধে ক্রোধ ও অহঙ্কারের প্রবেশ ।)

ক্রোধ । কই, কোথা সে ভ্রাতৃহত্যা ক্ষুদ্র শয়তান ? এই যে
ছষ্ট ! [বৈরাগ্যকে চপেটাঘাত ।]

মন । [ক্রুদ্ধ হইয়া] একি, তোমার ব্যবহার ক্রোধ ? আমার
সম্মুখে কোন্ স্পর্ধায় তুমি এই বালককে প্রহার কর ? উদ্ধত মূর্খ !
এখনই এর উপযুক্ত শাস্তি গ্রহণ কর । [ক্রোধকে মারিতে গেল ।]

বৈরাগ্য । পিতা, কি করেন—কি করেন ? ক্রোধের বশীভূত
হ’য়ে আত্মহারা হবেন না । ওদের ক্ষমা করুন—ক্ষমা করুন ।

বৈরাগ্যের গীত ।

প্রেমে -- কর আত্মজয় ।

প্রেমে ক্রোধ যায় গ'লে,—প্রেমে পায় প্রেমময় ।

প্রেমপথে ষাত্রা করে', ক্রোধ কেন অস্তুরে ?

ত্যজ ক্রোধ চিরতরে, কর জগৎটাকে প্রেমে জয় ।

[গীত শুনিয়া রাজা শাস্তুভাব ধারণ করলেন, ও ক্রোধ গালিয়া
জল হইয়া গেল । অহঙ্কার সভয়ে পলায়ন করিল ।]

বৈরাগ্য । দেখুন পিতা, প্রেমের তাপে ক্রোধ গ'লে জল হ'য়ে
গেছে ;—অহঙ্কার আপনাকে চিরতরে পরিত্যাগ ক'রে পালান' ।

(লোভের প্রবেশ ।)

লোভ । পিতা, রাজাধিরাজ ! (চরণ বন্দনা করিল ।)

মন । একি, লোভ ? তুমি আবার এখানে কেন ?

লোভ । পিতা, ঔদ্ধত্য নয়, আদেশ নয়, মিনতি ।—আপনার
রাজ্যে ফিরে চলুন । অতুলনীয় ঐশ্বর্য—অপরিমেয় সুখ—কোটি কোটি
রাজভক্ত প্রজা—সকলেই আপনার অপেক্ষায় র'য়েছে । কিসের
জন্য এই দুঃখ ভোগ পিতা ? এত ক্লেশ কি আপনার রাজদেহে
সয় ? ভেবে দেখুন দাঁক, কি সুখ, কি ঐশ্বর্যের মাঝখানে আপনি
ছিলেন,—আর আজ কতকগুলো কুহকীর চক্রান্তে প'ড়ে দীনহীন
বেশে কি দুঃখটাই না ভোগ কচ্ছেন ?

মন । না—না—লোভ, আমি এখানে বেশ আছি ! তুমি ফিরে যাও ।

লোভ । পিতা, এই কি 'বেশ' খাকা ? রাজরাজেশ্বর দীনহীন ভিখারীর বেশ ধারণ ক'রে ব'লছেন—“বেশ আছি !” জানেন কি পিতা, আপনি রাজ্য হতে চ'লে আসার পর থেকে, রাজ্য শ্রীহীন—আপনার পুত্রতুল্য প্রজারা সকলে বিষাদ সাগরে মগ্ন ?—

মন । প্রজারা কি বলে ?

লোভ । তারা সকলেই আপনাকে ফিরে পাবার জন্য কেঁদে কেঁদে আকুল ।

[রাজা একটু বিচলিত হইলেন । অমূল্য বৈরাগ্য গান ধরিল ।]

বৈরাগ্যের গীত ।

কে কার প্রজা, কে কার রাজা ?

কেন বৃথা মোহে মজা ?

ছাড় বিষয়ের চিন্তা,

বিষয় বিষয় ব'লে—দিন খোয়ালে,

(মন) আনন্দময়ে খোঁজ ;

(মন এখন) অন্তর্যামী কর পূজা ॥

মন । না না লোভ, বৃথা সুখ ঐশ্বর্যের প্রলোভনে, আর আমাকে ভুলাতে এ'স না ।

(লোভের অন্তর্ধান ।)

তোমার রাজ্য ঐশ্বর্য কিছুই আমার দরকার নাই।

একি ! লোভ কোথায় গেল ?

বৈরাগ্য। ভগবৎ-বিশ্বাসী বৈরাগ্যবান্ ব্যক্তির নিকট লোভ কি
টিকতে পারে ? পিতা, সে অদৃশ্য হ'য়েছে।

মন। তাহিতো বৎস, তারা প্রলোভন দেখিয়ে আমাকে পুনর্বার
আক্রমণ কর্তে চেষ্টা করেছিল, নশ্বর কামিনী ও কাঞ্চনে প্রলুব্ধ
ক'রে আমার আশ্রয় নষ্ট কর্তে উদ্যত হ'য়েছিল, তোমা হ'তেই
আমি আবার আমাকে ফিরে পেলুম। নির্বোধেরা জানেনা, যে
পরম ভাগ্যবান্ না হ'লে, বৈরাগ্যলাভ হয় না।

[বুদ্ধির প্রবেশ ।]

বুদ্ধি। মহারাজের জয় হউক, দেখুন মহারাজ, আমি আগেই
জান্তেম্ আপনি জয়যুক্ত হবেন ; বুদ্ধ মন্ত্রীর এখনও দূরদৃষ্টি আছে
মহারাজ !

মন। মন্ত্রি, যুদ্ধে আমি জয়যুক্ত হয়েছি বটে, কিন্তু বিবেকের
অদর্শনে আমি স্থির হ'তে পারিচ্ছিনে।

বুদ্ধি। [সহসা নেপথ্যেব দিকে দৃষ্টিপাত করিয়া] ও কে,
কে আসে ? প্রশান্ত জ্যোতির্ময় মূর্তি, ওঃ চক্ষু বাল্মে গেল। মহারাজ
আমি ঘাই, আমি পলাই, আর আমার হেথায় স্থান নাই। [বেগে
বুদ্ধির প্রস্থান।]

মন। একি ? মন্ত্রী হঠাৎ পলায়ন কলে কেন ?

বৈরাগ্য। বোধহয় গুরুদেব জ্ঞান আপনার নিকট আসছেন, তাঁকে দেখে আপনার মিত্ররূপী শত্রু বিষয়-বুদ্ধি পলায়ন কলে।

মন। সত্য, ঐ যে বিবেক গুরুদেবকে নিয়ে আসছে।

[জ্ঞান ও বিবেকের প্রবেশ।]

জ্ঞান। আশীর্বাদ গ্রহণ কর বৎস, পরীক্ষায় জয়ী হয়েছ,—
আর ভয় নেই।

মন। গুরুদেব, পদে আশ্রয় দিন।

[জ্ঞানকে মন ও বৈরাগ্যের প্রণাম করণ।]

বৎস বৈরাগ্য, [বিবেককে দেখাইয়া] ইনিই তোমার জ্যেষ্ঠ,
এর নাম বিবেক।

বৈরাগ্য। দাদা, দাদা! [বিবেকের পদধূলি গ্রহণ।]

[বিবেক বৈরাগ্যকে আলিঙ্গন করিল।]

বিবেক। ভাই, ভাই. আমি এতদিন চেষ্টা ক'রেও যা কর্তে পারিনি, তুমি অনায়াসে তা সুসিদ্ধ ক'রেছ। তোমার প্রভাবে কাম, ক্রোধ, লোভ ধ্বংস হ'য়ে গেছে।

বৈরাগ্য। দাদা, সে কেবল তোমারই আশীর্বাদে। তুমি তাদের বিনাশের জন্য ব্রত গ্রহণ ক'রেছিলে, আমি তোমার অবর্ত-
মানে সেই ব্রত উদ্‌ঘাপন করেছি মাত্র; এতে আমার কোনই গৌরব
নাই।

মন। গুরুদেব, আপনি এসেছেন,—এখন আমার পথ দেখিয়ে
দিন।

জ্ঞান । বৎস, তোমার কর্মপথ শেষ হ'য়েছে, তাই আমি তোমার নিকট এসেছি ; তোমার অন্তরে অন্তরে ভক্তি বিজড়িত, কিন্তু ভগবান কি বা কে এ তথ্য জানতে হ'লে অবশ্য জ্ঞান-পথেই আসতে হবে । কাল পূর্ণ না হ'লে, কেহই জ্ঞানপ্রাপ্ত হয় না ; দেখছি তোমার কাল পূর্ণ, তোমার শত্রুকুল নির্মূল

মন । গুরুদেব, এখনও মোহ, মদ ও মাৎসর্য র'য়েছে ।

জ্ঞান । না বৎস, যখন তুমি প্রলোভনের বিরুদ্ধে যুদ্ধ করছিলে, তখন তারা কামনাদেবীর মন্দিরে অগ্নিক্রীড়ায় পরস্পর ভস্মীভূত হ'য়ে গে'ছে ; হিংসা লালসাও সেই সঙ্গে দগ্ধ হ'য়েছে । কামনার মন্দির প্রজ্বলিত ;—দেখতে চাও ?

মন । না শ্রীভূ, আর তার প্রয়োজন নাই । কিন্তু গুরুদেব, যদি অধমের প্রতি কৃপা করে দর্শন দিলেন তখন আমায় বলুন, এ বাড়ি আমার উপর দিয়ে বয়ে গেল কেন ?

জ্ঞান । বৎস, ভগবানকে ভুলেছিলে তাই তোমার এ অবস্থা ।

মন । গুরুদেব, এ কথা তো আমায় এতদিন কেউ বলেনি, আপনি যথার্থ আজ্ঞা করেছেন, গুরুদেব, বলুন কি কলে' আমি এখন তার দেখা পাই ?

জ্ঞান । গৃহদেবতার গৃহের চাবি তোমার নিকটেই আছে, তুমি ইচ্ছা কলেই তাঁকে দেখতে পার ; যদি একবার মনঃস্থির ক'রে দেখ !

মন । গুরুদেব, আমি আপনার আশ্রিত, আমায় দর্শন করান ।

(সকলের প্রস্থানোত্তোগ)

(সুখ ও দুঃখের প্রবেশ)

মন । তোমরা কে ?

দুঃখ । মহারাজ, আমরা আপনার নিকট বিদায় নিতে এসেছি,
আমরা সুখ ও দুঃখ ।

মন । এঁরা । তোমরা সুখ—দুঃখ ? তাহঁতো সুখ, তুমি
এতদিন কোথায় ছিলে ? আমি তখন তোমায় পুরস্কার দেব'
ব'লোছিলেম, কিন্তু এখন তো আমার কিছুই নাই ।

সুখ । মহারাজ, আমরা কিছুই চাই না, আপনি প্রসন্নমনে
বিদায় দিন, এইমাত্র প্রার্থনা ।

দুঃখ । হাঁ মহারাজ, আপনারও ভাল, আমাদেরও ভাল ।
তা হ'লে বরং এই আশীর্বাদ করুন, আমরা যাঁর আদেশে এসেছি,
যেন নির্ঝঞ্জে তাঁর নিকট পৌঁছাতে পারি ।

মন । তোমরা ত বড় ভাল ছেলে দেখছি হে, তবে আর
কি ব'লবো, তবে আমি বৎস, তোমাদের মঙ্গল হোক ।

(সুখ দুঃখ ব্যতীত সকলের প্রস্থান ।)

সুখ দুঃখের দ্বৈত গীত ।

সুখ সুখ বলি, হইয়ে উতলি,
উঠিলে প্রৌঢ় শিখরে ।

(পুনঃ) বার্কক্যে নামিতে, ভাবিলে হে চিতে,
কই সুখ কোথা বিহরে ॥

আলো ছায়া যেমন, সুখে দুঃখে তেমন,

কেহ করে কভু না ছাড়ে ।

সুখ কোথা গেল, ভাবিয়া কি ফল,

(দেখ) সময় ঘাইছে সরে ॥

(গাহিতে গাহিতে সুখ দুঃখের প্রশ্নান ।)

—

চতুর্থ দৃশ্য ।

গৃহদেবতার মন্দির সম্মুখ

(জ্ঞান, মন, বিবেক ও বৈরাগ্যের প্রবেশ ।)

বিবেকের গীত ।

যদি চাহ সে সুন্দরে, কর হৃদয় সুন্দর ;

পরম সুন্দর হৈবাব ।

কোথা খোঁজ তারে, হৃদয় মাঝারে,

আত্মরূপে তারে পাইবে ॥

নির্মল অস্তরে জ্ঞান নয়নে,

দেখ বসে তিনি হৃদি পদ্মাসনে ॥

জ্যোতির্শয় প্রভা, মহিমাময় বিভা

সচ্চিদানন্দময়ে দেখিবে ।

জ্ঞান । যাও মন গৃহদেবতার মন্দির দ্বার উন্মুক্ত কর ।

মন মন্দিরের কবার্ট খুলিয়া ফেলিল । দেখা গেল পুরোহিত
ধর্ম পূজায় বসিয়া আছে !

মন । একি !—পুরোহিত !

ধর্ম । (মনকে দেখিয়া উল্লসিত ভাবে বাহিরে আসিয়া) এসেছ

মন ? (গৃহদেবতার দিকে চাহিয়া) প্রভু, তোমার করুণা অনন্ত ।

মন । তাইত দেব ! আপনি এখানে ?

ধর্ম । (মনকে বুকে তুলিয়া লইয়া) “তোমার স্মৃতি ফিরে
আসুক, আমি এতকাল ভগবৎপদে সেই প্রার্থনাই করে আসছিলুম ।
আজ তোমাকে আবার ফির পেয়ে আমার সকল দুঃখ দূর হয়ে
গেছে । মন, আজ আমার আনন্দ রাখবার স্থান নেই ।

মন । প্রভু, আপনি দেবতা । অনন্ত করুণার আধার ?
এতদিন আপনাকে চিন্তে পারিনি ।

(মন্দির মধ্য হইতে হাত ধরাধরি করিয়া ভক্তি, প্রীতি

ও শাস্তির প্রবেশ ।)

ভক্তি । মহারাজ ! আমাদের অভিবাদন গ্রহণ করুন !

মন । একি ! সহসা আমার শরীর রোমাঞ্চিত হয়ে উঠল
কেন ?—অস্তুর আমার পুলকিত ! গুরুদেব, একি ভাব ? কে মা
তোমরা ?

ভক্তি । মহারাজ ! আমি ভক্তি ;—এরা আমার দুই বোন—
প্রীতি আর শান্তি ।

জ্ঞান । মন ! ভক্তি, প্রীতি, শান্তি, আজ তোমায় অস্তরে
বাহিরে ঘিরে তোমায় বরণ করে নিতে এসেছে । মন ! তুমি বড়
ভাগ্যবান ! এইবার তোমার আত্মদেব দর্শন হবে ।

ভক্তি । মহারাজ ! আমরা গৃহদেবতার সেবিকা, গৃহদেবতার
গন্ধিরেই আমরা থাকি । আসুন মহারাজ, আপনার গৃহদেবতাকে
দর্শন করবেন আসুন ।

ভক্তি, প্রীতি ও শান্তি দ্বারা বেষ্টিত হইয়া রাজা গৃহদেবতার
গন্ধিরে প্রবেশ করিল ।

জ্ঞান । ঐ শোন মন, ওঙ্কার ধ্বনিত হচ্ছে ; এই শব্দ ব্রহ্ম হতে
বেদ, বেদাঙ্গ, শাস্ত্রাদি প্রণীত হয়েছে ; এই সুররূপী ব্রহ্ম হ'তে রাগ
রাগিনী আলাপ ও মৃচ্ছনা আবির্ভূত হয়েছে । এই শব্দময় ব্রহ্ম
হ'তে আকাশরূপী তুমি মন উৎপন্ন হয়েছো : এইখানে তুমিও মিশে
যাবে । বল সৎ চিৎ আনন্দময় ।

মন । সৎ চিৎ আনন্দময় ।

জ্ঞান । ষৎস, সত্যকে চিনেছ, চৈতন্য লাভ করলে, এইবার
আনন্দ লাভ কর । দেখ মন, যা কেউ সহজে দেখতে পায় না তাই
দেখ,—যা হ'তে কোটি কোটি সুন্দর সৃষ্টিত হয়, পরম সুন্দর নিজ
আত্মাকে দর্শন কর । মন, এইবার আমারও শেষ, চৈতন্যের জগুই
জ্ঞানের প্রয়োজন ছিল, এখন যা দেখবে তা' জ্ঞানাতীত । আশীর্বাদ
করি তুমি আনন্দময় হও ।

জ্ঞানের গীত ।

পরম মনোহর চৈতন্য সাগর হের নয়নে ।

স্বমধুর গম্ভীর ওঁকার বাঙ্কার শুন শ্রবণে ॥

সুন্দর স্থস্থির, আনন্দ মুরতি ধীর

পরম আনন্দময় বিরাজে এখানে

কত কোটি রবি শশি ডুবিলে উঠিলে ভাসি

জ্ঞান বিজ্ঞান রাশি নামিলে চরণে ।

(পট পরিবর্তন)

সহসা চৈতন্যসাগর মধ্যে নীলপদ্মোপরি আত্মার আবির্ভাব ।

পদপ্রান্তে গোলাপী, সাদা ও হলদে রংয়ের

তিনটি পদ্মের উপর যথাক্রমে শাস্তি,

ভক্তি ও প্রীতি আসীন ।

মন । এ কি ! এ কি ! কোটি সূর্যের এত জ্যোতিঃ নাই ।

কোটি চন্দ্র এত স্নিগ্ধ নয় । আনন্দসাগর, আনন্দময়, কে তুমি—

কে তুমি ?

মনের আত্মার সঙ্গে বিলীন হওন ।

জ্ঞান । বিরাজে আনন্দময় হৃদয়ে দেখনা ।

জ্ঞান, ধর্ম, বিবেক, বৈরাগ্য, ভক্তি, প্রীতি ও শান্তির
সমবেত সঙ্গীত ।

বিরাজে আনন্দময় হৃদয়ে দেখনা ।

হেথা নাই ভেদাভেদ সবাই অভেদ কারু নাই মানা ॥

যে কোন হোক ধর্ম যত সব জেন হেথা আসবার পথ ।

(ভূমি) ভেদ না করে কোন যতে চলে এসনা ॥

লাল গেরুয়া নীল আকরাধা ত্রিশূল চাঁদ ক্রুশ পৈতা শিখা ;

সবার হেথা পাবে দেখা, তাকি জ্ঞান না ॥

শব্দশিখা ।

